

南宋文範

和16
341
7



利
294
M



南宋文範卷二十六目錄

進故事 講義

進故事 四章

罷講日講官翰林學士兩省官輪進

進故事

三月壬辰進故事

言災變進故事

進故事

歷代名臣奏議

經筵講義

熙明殿進講敬天圖周易賁卦

所錄
有物

張綱

程俱

彭龜年

徐鹿卿

高斯得

徐元杰

牟深

張栻

文天祥

南宋文範卷二十六

長洲顧少卿先生鑒定

秀水莊仲方編

進故事 講義

進故事四章

張綱

唐鑑太宗謂羣臣曰朕聞直言之路以利國也而比年上封事者多訐人細事自今復有為是者以讒人罪之

臣聞自古願治之君未嘗不欲以求言為急故大開公正之路使天下之人皆納忠於上於是端拱穆清而留聽不倦雖四方萬里之遠政化之善惡風俗之薄厚靡不畢知此盛德事也然求言非難而聽察為難以人主之尊而虛心於敢言之士則上自百執事之列下至一介芻蕘之賤孰不殫志竭慮願有所獻而其閒貌言之華至言之實苦言之藥甘言之疾烏得而不察哉又況外示切直內懷姦詐偽辭矯辨而訐人之細事者真小

人之所爲也直欲盜名以妄上聽託公以報私仇此而不革則禍及善良傷化敗俗爲害不細唐太宗勵精庶政而於聽言之際能察其奸是乃人主之難事此史氏所以書之以昭示後世也昔者大舜有大焉善與人同舍己從人樂取於人以爲善故能勤總章之訪廣四岳之詢其於聽言之道可謂至矣然於邇言則察之於讒說則望之得非以邇言善惑讒說善誣唯能察而去之斯其所以舜也歟恭惟陛下聖敬日躋聰明天縱觀書乙夜復留意於轉對之臣覽奏四方尤樂聞於當世之務是欲恢張治道復之太平聽納之勤視古無愧而聞者姦人蔽欺分曹爲黨一時乘權習勢之徒輒敢以流言飛語陰中善類天下方懷憤切齒而大明旁燭洞見朋邪凡是告訐而言上不實者論正厥罪悉投遠方以爲後日之戒於是有識之士乃始歎忻鼓舞咸爲大道之行天下爲公復見於斯時然則虞舜之望讒說唐太宗之罪讒人與夫今日流放告訐之類實異世而同符

者也天下幸甚

二

唐書李石傳文宗嘗顧鄭覃曰試論我猶漢何等主覃曰陛下文宣主也帝曰渠敢望是石欲彊帝志使不怠因曰陛下之間而覃之對臣皆以爲非顏回匹夫耳自比於舜陛下有四海春秋富當觀得失於前日進月長以齊堯舜奈何比文宣而又自以爲不及惟陛下開肆厥志不以文宣自安則大業濟矣

臣聞登山而不登夫泰山無以小天下觀水而不觀諸滄海無以狹眾流然則學聖人而不學至堯舜又安能超五霸而冠百王乎夫聖人之道至堯舜而止矣以二典考之其政不過欽天時治人事用賢才明賞罰數事而已非至深而難明甚高而難行也然則三代以下漢魏晉宋隋唐之世迄無一君能跂而望焉其何故哉未必皆其天資庸暗不足與有爲也其間願治之主往往視唐虞之際以謂非復後世之所能及則亦自狹其志

而卒無所成且漢之治莫如文帝其次則稱孝宣然張釋之爲文帝言天下事帝曰卑之無甚高論令今可行於是釋之言秦漢間事帝乃稱善宣帝因太子有用儒之請嘗曰漢家自有制度本以霸王道雜之奈何純任德教用周政乎由是觀之二帝在漢則爲賢君惟自狹其志故功業之所就如是而已唐鄭覃以漢二帝比文宗而文宗猶不敢當則太和開成之政一切委靡無足怪者李石之言固可爲萬世帝王之法惜乎文宗不能用也恭惟皇帝陛下聰明睿智出于天縱躬履艱運允迪先猷兢兢業業夙夜不怠故自中興以來雖海內安妥不敢自遐逸也臺池苑囿之觀聲色狗馬之奉一無所好萬幾之暇獨留意經籍深達古帝王淵微之旨一時羣臣章句講說之學莫能仰窺萬分可謂有堯舜之資矣非特有其資而已也其志蓋將力行而有至焉然則躋時於泰和納俗于時雍固不難矣易曰天行健君子以自強不息陛下體天德而行健其所以措諸事要

與唐虞比隆者亦在乎自強而已矣顏淵匹夫也而猶自比於舜况萬乘主乎臣願陛下益留聖心無使二典專美于前天下幸甚

三

三朝寶訓太宗嘗謂近臣曰國家以民爲本百姓以食爲命則知儲蓄最爲急務昨江南災旱朕亟遣賑貸果無流亡盜賊之患若非積粟何以救之當諭諸路轉運常爲計度省察儲蓄無使損敗臣竊謂財賦有國之大計當豐亨豫大之時蓄積爲備不可一日闕于天下天官九職洪範八政必以農穀爲食貨之首者以見先王於此未嘗不留意也恭惟太宗皇帝紹開帝業四方僭僞悉以蕩平方是時年穀屢豐兵革偃息倉廩府庫所在充滿而猶宣諭近臣儲蓄是務督諸路以計度察倉庾之損敗常恐一旦灾旱無以賑貸而有流亡盜賊之患然則宸慮深遠豈特取足于目前而已哉蓋天時地利財賦之所自出必資人力以

爲之是謂衣食之源而生民之命歛之有常制則民樂輸散之有常度則用不乏如其不然事有出于意外而物不素備則驟而圖之必且橫取於民民力有時而不應策將安出于是商功計利之臣始得以行其說而頭會箕歛天下有不能堪者矣漢稱桑弘羊唐稱劉晏二子材術過人載在方冊後之言利者莫不祖述之以爲不可歧及然以臣觀之巧算倍征殄民資澤乃商功計利之臣耳且增大農之部丞寵天下之貨物坐市列肆轉販相輸以至入粟補官以貲贖罪古所未有而弘羊發之行四利去四害以羨補乏利無以入諸路轉輸如見錢流地上他人所不能而晏獨能之觀其材術如此而計其功效誠足以舒一時之急奈何非先王之仁政使其人生于唐虞三代之世其策果安用哉故夫論治道者必以國計爲先而論國計者必以儲蓄爲急方今天下充國計者有田畝之稅關市之征鹺茗之息酒權之課是數者其大略也而取之皆有藝極是謂常經不

可得而增損凡朝廷祭祀之供使客之奉六軍之須萬官之俸與夫乘輿服御匪頒好用之式皆仰此取足焉以其歲之所入幾何較其歲之所出幾何則其有餘不足大概可見矣然古人謂取天下之財供天下之用未有不足者況陛下自中興以來勵精圖治不邇聲色不務宴遊前世侈靡之事皆所不爲則于財賦固無輕費妄用宜其蓄積加多而沛然充羨今乃不然都國之間補苴漏言匱乏者十常八九此無他官吏不能體國並緣爲奸上下相蒙其弊乃至此耳禮曰國無九年之蓄曰不足無六年之蓄曰急無三年之蓄曰國非其國今日之事唯當詔天下謹財用之蓄藏而令主計之臣稽考每歲出入之數積其贏餘毋得妄費以待不時之需則所謂九年之蓄者數歲之後亦可以馴致其效顧不美歟

四

三朝寶訓大中祥符元年上半年上語近臣曰京師民庶邇來漸事奢侈

衣服器玩多傳以金雖累申條約終未禁止工人鎔鍛爲箔日增其數計所費金歲不下五六萬兩壞不可復浸以成風良可戒也臣聞好侈靡者天下之常情尙素樸者人君之美化自古帝王當太平極治之時懼天下之人侈心將萌必命有司申舊章頒憲度昭節儉抑淫侈凡服用之過制者莫不有禁蓋欲檢押其常情使之成忠厚之俗也仰惟真宗皇帝纂列聖之休撫盈成之運豐亨裕大萬物盛多故民間漸事奢侈而以黃金巧飾器服聖慮高遠究極其弊明詔近臣申嚴條約深得古帝王之用心矣蓋金爲天下之至寶而國用之所資使眾庶之賤皆得靡瀆于器服之間豈不重可惜哉臣嘗考之于古蘇秦說趙陳平間楚衛青繫胡有功其所賜黃金或萬鎰或四萬斤或二十萬斤而梁孝王一小國所積乃至四十萬斤長安之亂省中金以萬斤計者猶六十匱何其多也自魏晉以降始不聞有此充羨夫金之爲物產於天地之間百鍊而不耗宜乎後世之多於前

古然以近史觀之其數未嘗有及於古者豈非風俗侈靡積習耗蠹而致然耶且海內產金之地有幾鑿山披沙積累于銖兩之微其得之不爲易矣一旦聚于都市末作之徒乃併肩列肆競麗爭功鎔之銷之以爲悅目之具以一京師而計所費金歲不下五六萬兩合天下而較之其費不知幾何以數十歲之積累未必能供一歲之用然則近時之金少于前古無足怪者仰惟陛下恭儉愛物出于天性固嘗念庶俗侈靡屢勅銷金之禁然而比年民物阜康驕奢所習殊未衰止器服之飾過制尤盛銷金之外又有泥金貼金剔金縷金爲絲爲線之類號名非一儻不重其賞罰而申嚴之示以必行則因循歲月未見其能止也誠能止之則非獨寶貨之藏免于妄費而下不僭上賤不擬貴亦足辨天下之大分臣觀三朝寶訓竊見國家禁銷金者莫嚴于真宗之朝故敢昧死以祥符聖訓爲今日獻

進故事

罷講日講官翰林學士兩省官輪進

程俱

三朝寶訓太平興國八年太宗謂近臣曰國家之事不以大小皆
有利害朕近閱工作見削藤者凡藤一斤堪用者止三兩餘皆
棄物因念南方產藤去京師六七千里水陸輦送虛爲勞費當諭
廣南諸州凡藤皆削褫訖輸京師又大通冶出鐵以鍛兵器比來
輦送作坊復更烹煉然後可爲兵刃當諭本冶製成刀劍之樸乃
以上供如此二事計省力役不少天下無限利病官吏不能爲朕
經度此固小事當有大於此者宰相曰一州舒慘全繫長吏若精
心勤事上副聖旨則境內之民受錫矣又有司以油衣帑幕故壞
者請毀之上曰此盡毀棄亦可惜也乃令試加煑浣再染練付諸
軍創旗數千皆采制鮮妙因召三司使謂曰朕富有天下豈慮少
闕但念耕織之苦每事不欲枉費卿等宜盡心又時東甯務請以
退材供薪詔使臣閱視擇可爲什物者作長牀數百分賜宰相樞
密三司使因謂李昉曰山林之木取之甚費民反以供爨亦可惜
也昉曰陛下聖智高遠勤儉求理事無大小動出意表雖在微細

無有遺棄古人以竹頭木屑皆可充用正在于此惟慙臣下不克
盡副天心眞宗嘗出尚書內省文簿示近臣皆諸司奏知榜子覆
而書之曰官中文簿不費好紙此先朝舊制乃知惜費之旨也
臣觀太宗眞宗之時四海初一僭竊之國皆舉圖籍封府庫歸
之有司當是時上下富實錢穀帛充物陳朽然且不忘恭儉
留神小物如此其至者凡以畏天道而惜民財故也則其天下
欣戴享國垂統安策長久者非仁民愛物之效歟夫古之賢臣
進戒其君未嘗不以恭儉爲本也故曰慎乃儉德惟懷永圖又
曰儉德之共也侈惡之大也此堯舜以來至于今天下不易之
論也而近世講解之人乃舉克勤于邦克儉于家創爲一偏之
說以謂儉乃家人之行用以啟人君廣大之心其後怙權希寵
之臣因得以藉口誤國致天下糜爛土摧而率不能振作者以
是故也夫以天下之眾而皇天立一人以爲之君者凡使之司
牧庇覆生養安樂天下之人而已故天下之人極其所以尊榮

資奉以報之則今之稱號等威禮儀奉事貢賦共獻之制是已此則天之道也過是而欲天下之人以逸豫侈靡無藝不經之事奉之非天道也是則古人所謂人臣踰制度人主過天道者也傳曰節用而愛人今陛下愛人之心亦可謂至矣而國用或不節則國計不足國計不足則必橫斂于民此必然之理也今天下州郡無向者十之五六而所存之郡又皆殘破之餘矣今戶部財用之入無向者十之四五而軍食浮冗之費則過于向者多矣此非痛自檢約上下一體愛惜財用如祖宗之時未有能濟者也然每有事則有司輒以近年之制度為率或請減半或三之一而其費固已不勝其冗也夫今之富實豈望宣和之半哉而今類以減半為多且曰如是則削弱如是則非國體此亦不仁之甚非所以承德意而愛生民也然陛下每下詔札未嘗不以播越微弱為言此少康周宣之用心也則所謂削弱者非所諱也且財用不給則必益取之民椎膚剝髓至使無衣食

之資則棄其田業相煽為盜以人為糧而已當是時削弱恐甚于裁損也此臣愚所以私憂過計而太息流涕者也

進故事

彭龜年

戴盈之曰什一去關市之征章

臣龜年曰盈之此說乃後世不能復古之根本也凡古制之所以壞者必有私情蠹之私情不能去而求復古無是理也盈之既知什一之不可重關市之不可征亦知民之不堪而古之當復矣在戰國時如盈之用心者豈不可進而孟子闢之如此其嚴者政恐有所牽繫也盈之所謂今茲未能者果何為哉不求其所以未能者先去之而徒欲少損以收復古之名此君子所甚惡也蓋是非不兩立公私不錯施邪正不並用一廢則一興一消則一長所以古人謂去惡如農夫之務去草焉絕其本根勿使能植則善者信矣未有惡未去而能為善者也謂之今茲未能則是其為國猶有資于橫斂而但欲少損以俟來年而後

去安保來年不復已乎奈何世之謀國者多爲此論以其易入也聽人之謀者多喜此論以其易從也若井田法難卒行宜少近古限民名田以贍不足之說若古人節儉什一而稅如太古難宜少倣古以自節之說世皆以爲通于世務不知自今觀之果何益哉不特謀國如此人君子遷善改過之間而一爲此論所惑則亦將因循苟且展轉汨沒卒陷于過失而已耳可不戒哉

三月壬辰進故事

徐鹿卿

進杜衍抑內降故事

臣聞至厚者人主之恩至公者朝廷之法仁祖之治天下不以恩而勝義不屬法以徇情公法旣明恩意亦著真可以爲子孫萬世之龜鑑矣夫君德以寬大爲本匹夫庶人猶不忘親故之愛矧人主富有天下獨無親親以睦友賢不棄之情乎是所謂恩也然爵祿者天下之公器豈一人之私哉吾之心未嘗不欲

厚於其厚也蹈湯赴火者有望焉懷材抱藝者有待焉苟私以與人則彼將曰盡瘁事國不如息偃而在牀儒冠誤身不如象養于襦袴使凡皆若是其誰將與其功乎是故禁中之請祈不能絕而審覆終歸之有司內降之恩澤不能無而可否悉付之公論是所謂法也我仁祖痛塞倖門屈意公論自常情觀之疑於狹矣而天下後世終不敢以爲少恩者蓋仁祖之用心未嘗不篤親愛之誼而朝廷之守法終不能掩仁祖之心臣故曰公法旣明而恩意亦著也昔唐景龍間不勝宮掖之私始有斜封墨勅之濫朝紳之無恥者往往因之以求進達左拾遺辛替否上疏切諫以爲百倍行賞十倍增官使府庫空竭流品混淆戰士不盡力朝士不盡忠人旣散矣獨恃所愛何所歸乎可謂至忠至切至直至當之論陛下聖恩寬厚不愧仁祖而守法隳廢頗類有唐近日以來橫恩捷出宗姻雜遷于班聯私昵幾叨于僕御或換授之際一旦而超數十載之辛勞或選調之微躡進

而欲取京官之職任禁掖索無名之封告星史干非分之陞差此手浸滑如用方來凡陛下前之所欲未遂者亦小快矣然今時果何時哉激昂人心惟有名器上不愛重人將有辭執奏不力是大臣不以杜衍自期也切諫不聞是廷臣不以辛替否自勉也若謂貴為天子不得自由此乃小人誤國欺君之說幾於一言喪邦者豈足上惑聖聽哉書曰天命有德又曰天工人其代之臣愧慙寸衷不敢望陛下求諸法尙願陛下求諸天法天卽法仁祖也臣言雖狂愚意主忠愛若徒以故事應故事則又非臣事君之意亦非陛下用臣意也

言災變進故事

高斯得

李丞相沆每朝謁奏事畢必以四方水旱盜賊不孝惡逆之事奏聞上爲之變色慘然不悅旣退同列以爲非間丞相曰吾儕當路幸天下無事丞相每奏不美之事以拂上意然又皆有司常行不必面奏之事後盍已之公不答數數如此因謂同列曰人主豈可

一日不知憂懼也若不知憂懼則無所不至矣

臣嘗觀唐虞盛時大臣進說其君雖平居無事未嘗不存警戒之意蓋人主不可一日無懼心而保持是心使久而不息則大君之責也禹皋陶論治于舜之前舜進禹使之昌言禹不及其他獨舉前日洪水滔天浩浩懷山襄陵下民昏墊者以爲告禹豈自伐其功者哉蓋將以保帝舜泮水微子之心使之不忘一日之懼所謂昌言莫大於此後世大臣鮮能知此義者惟漢魏相粗有見乎此相敕掾史案事郡國及休告從家還至府輒白四方異聞或有逆賊風雨災變郡不上相輒奏言之夫宣帝之時吏稱其職民安其業亦可以言治矣相乃常以逆耳之事告其君使之知所警懼不敢安逸可不謂賢乎我國朝名臣李沆相真宗皇帝每奏事畢必以四方水旱盜賊不孝惡逆之事奏聞上變色不悅同列皆止之而沆不爲止且曰人主豈可一日不知憂懼若不憂懼則無所不至矣嗚呼沆之此言真可謂得

南齊書卷二十一
九
大臣之體矣雖周公作無逸以戒成王何以過此且咸平景德
乃國家至隆極盛之際而為宰相者不以已治安為足方以儆
戒無虞為心用能弼我祖宗丕丕基傳之無窮而施之罔極豈
非萬世宰相之法哉臣竊見比者江浙閩中諸郡同日大水流
殺人民動以萬計中外一辭謂非小變然大臣恬然視之未聞
有孜孜汲汲推原致異之由圖維弭災之策為陛下力陳之者
一二廷臣不得已而有言亦人臣願忠職分之常耳頗聞惡其
強聒指為張皇抑何居其位而不知其任耶夫魏相李沆居天
下無事之時而喜言災變之事今日大臣當大異較炳之後而
惡言災變之實豈以陛下不樂聞之而願望以至此乎臣願陛
下虛懷訪逮示臣以喜聞警戒之意如舜之進其臣使之昌言
庶幾自今或有變異有以開廣上心博采人言共圖銷弭之術
宗社幸甚

進故事

徐元杰

唐德宗時陸贄論淮西事宜狀曰克敵之要在乎將得其人馭將
之方在乎操得其柄將非其人者兵雖多不足恃操失其柄者將
雖材不為用將不能使兵主不能馭將非止費財玩寇之弊亦有
不戢自焚之灾

臣聞人主之用天下惟明與斷而已明足以有別則知人而善
任使臨事不至于乏才斷足以有為則操縱予奪莫不在我舉
天下英雄豪傑之士莫不奔走鼓舞于籠絡駕馭之中必如是
則將得其人而敵國外患非所憂矣其或平居暇日咨訪之不
度體認之不親有才而不能致其用能用而未必當其才而況
依違牽制或昧于折奸宄之萌姑息含容寢失其所謂牽制之
道其始不有以杜憑陵之漸其卒未有不至于橫潰四出而不
容遏者此春秋之季漢唐之末八代紛紜之際其證具存于方
冊者不可以不察也唐德宗猜疑多忌有將而不能馭將操失
其柄久矣當時九節度之師初未嘗不惟上之令自夫希烈懷

光之徒一失于制馭他日之患不待智者而後知陸贄忠于德宗者也因論淮西事宜而告帝以克敵之要實在於將得其人繼之曰馭將之方在乎操得其柄又斷斷然反其辭曰將非其人則兵雖多而不足恃馭失其柄則將雖材而不為用極言其弊以為不止于費財玩寇而已諄諄然語之以不戢自焚之灾吁贄之言亦切矣惜乎明不足以知李晟之忠勲斷不足以止懷光之鐵券奉天紛擾之患有不可勝禦者至今令人掩卷三歎而已吁有明謨糾斷之光武然後二十八將之才各隨其志能而有以勵其中興之功有剛明果斷之憲宗然後善用裴度之忠而李愬韓弘之徒亦各得以勉其克復之效曾謂干載間出之真主而俾光武憲宗專美于漢唐之間哉臣故於陸贄之言益惓惓焉

進故事

牟澧

昔程顥上神宗劄子以為君道之大在乎稽古正學明善惡之歸

辨忠邪之分曉然趨道之正故在乎君志先定君志定而天下之治成矣所謂定志者一心沈意擇善而固執之也夫義理不先盡則多聽而易惑志意不先定則守善而或移惟在以聖人之訓為必可法不為後世駁雜之政所牽滯不為流俗因循之論所遷惑信道極於篤自知極於明任賢勿貳去邪勿疑必期致世如三代之隆而後已也

臣聞學之為王者事其已久矣堯舜禹湯文武汲汲夫以堯舜禹湯文武之治天下無他道焉汲汲於學而已有堯舜禹湯文武之資學堯舜禹湯文武之學而治不唐虞三代臣未之信也恭惟皇帝陛下睿哲由於天稟聖學得之心傳嗣服之初日以講學為急真古帝王之用心也然臣竊以為君道莫先於講學講學莫先於立志蓋人主一心攻之者眾志不先定則中無所主而外物或得以轉移之蔽欺之言入則是非有不得其正私比之言入則喜怒有不得其正功利之言入則取與有不得其

正便佞之言入則好惡有不得其正此學之大戒也故程顥拜
疏神宗皇帝首以定君志為講學之要顥伊洛大儒也世號之
曰明道先生此真帝王之格言也臣願陛下思先皇付託之重
覽程顥進諫之疏若稽古訓堅凝初志使此心清明終始如一
日延見羣臣虛心下問以考政事之得失觀羣臣之志趣謂天
維顯思命不易哉者正論也謂天命不足畏者邪說也謂憲章
法度所當遵守者正論也謂祖宗不足法者邪說也謂君子小
人不可並立者正論也謂兼容而兩用之者邪說也謂每旦視
朝虛心訪問者正論也謂尊嚴淵嘿使人不可窺測者邪說也
謂民罔常懷懷於有仁者正論也謂峻法立威使民不敢慢易
者邪說也謂損上益下節用愛人者正論也謂恭儉無足取者邪
說也陛下試以是為察言觀人之鑒而邪正之辨判如黑白矣
今臣以非才誤叨勸講大懼無以仰裨聖聰用敢推廣程顥之

說為陛下告惟陛下垂聽

經筵講義

張栻

二南之詩聖人示萬世以制治之本源乃三百六篇之綱要如易
之首乾坤然萬草次于關雎蓋述后妃雖貴不可忘其初處宮室
之中而思其在父母家之時居富貴之位而念夫女工之勞感時
撫事而因以起其歸寧之心思其節儉敦本孝愛恭敬薰然見乎
其辭反復誦詠之則可以得其趣矣一章思夫在父母家之時方
春葛延蔓于中谷維葉萋萋然其始茂也黃鳥聚于棘木其鳴啾
啾然其甚和也誦此章則一時景物如接吾耳目中矣二章維葉
莫莫則是葛既成而可采之時也於是言其刈穫之以為締紵如
此服之無厭也蓋躬其勤勞而享之則安耳誦此章則其敦本之
意可見矣三章言其因是以思其父母告師氏以言歸污治其燕
私之服澣潔其朝見之衣澣害否言何者當澣何者當否治其
衣服蓋欲以歸寧父母也誦此章則其孝愛恭敬與夫節儉之意

又豈不熏然于言辭之表乎古者雖后妃之貴亦必立之師傅以
詔之故此詩言歸必首以告師氏而左氏傳亦謂傅母不在宵不
下堂則知師傅之職所以朝夕輔導之也法家拂士非惟人主不
可一日無在后妃亦然誠以人心易動貴驕易溺處其極而無所
畏憚則其可憂將有不可勝言者是以古之明君與其后妃相與
夙夜警戒而不敢少忽乎此也臣嘗考周家建國自后稷以農事
爲務歷世相傳其君子則重稼穡之事其室家則躬織紉之勤相
與咨嗟歎息服習乎艱難詠歌其勞苦此實王業之根本也如周
公之告成王其見于詩有若七月皆言農桑之候也其見于書有
若無逸則欲其知稼穡之艱難知小人之依也臣以爲帝王所傳
心法之要端在乎此夫治常生于敬謹而亂常起于驕肆使爲國
者而每念乎稼穡之勞而后妃又不忘乎織紉之事則心不存
焉寡矣何者其必嚴蒸朝夕而不敢怠也其必懷保小民而不敢
康也其必思天下之飢寒如已飢寒之也是心常存則驕矜放肆

何自而生豈非治之所由興也歟美哉周之家法也聖哲相繼固
不待論而其后妃之賢見于簡編太王之妃則姜女也而文王之
母太任妃則太姒而武王之后又邑姜也則皆助其君子焦勞于
內以成風化之美觀后妃則太王文武之德可知矣以此垂世而
其後世猶有若幽王者惑褒姒而廢正后以召犬戎之禍而詩人
刺之曰婦無公事休其蠶織蓋推其禍端良由稼穡織紉之事不
聞于耳不動于心以至于此故誦服之無數之章則知周之所以
興誦休其蠶織之章則知周之所以衰其得失所自豈不較著乎
以是意而考秦漢以下其治亂成壞之源皆可見矣

文天祥

文天祥

臣聞賁文飾也色相間則成文故柔來文剛剛上文柔相間所以
爲賁賁離下艮上離之體中以一柔間兩剛是柔來文剛艮之體
上一以剛乘兩柔是剛上文柔使獨剛獨柔不相爲用則不成文
矣此言賁之卦義也天之文爲二曜五行象緯交錯故曰觀乎天

文此言天之賁也人之文爲三綱五常倫理次序故曰觀乎人文
此言人之賁也以上象易象大意臣竊窺先皇帝作圖之旨以敬
天爲名其於賁卦實摘取觀乎天文以察時變一條臣謹按圖義
而爲之辭臣竊維天一積氣耳凡日月星辰風雨霜露皆氣之流
行而發見者流行發見處有光彩便謂之文然有順有逆有休有
咎其爲證不一莫不以人事爲主時時世也象易聖人不曰天變
而曰時變蓋常變雖麗於天而所以常變則係於時人君一身所
以造化時世者也故天文順其常則可以知吾之無失政一有變
焉咎卽在我是故天文者人君之一鏡也觀鏡可以察妍媸觀天
文可以察善否且如歷家算日食云某日當食幾分固是定數然
君德足以消弭變異則是日陰雲不見天雖有變而實制於其時
又如旱魃灾也才側身修行則爲之銷去熒惑妖也才出一善言
則爲之退舍天道人事實不相遠自古人君凡知畏天者其國未
有不昌先皇帝深識此理故凡六經之言天文者類聚而爲之圖

以便觀覽且恐懼修省焉聖明知敬嚴父之圖卽敬天在此矣嗚呼曷其奈何不敬

南宋文範卷第二十六

南宋文範卷二十七目錄

謝除邇英殿說書表

楊時

謝除資政殿學士宮祠表

許翰

乞回鑾表

宗澤

遺表

建炎二年七月

宗澤

謝許侍養表

播芳文粹

胡安國

謝罷給事中表

播芳文粹

胡安國

賀收復湟州表

葛勝仲

謝除知福州到任表

張守

謝賜對衣金帶鞍馬表

張守

賀建築隆兌州城寨表

汪藻

謝除顯謨閣學士表

汪藻

謝轉官表

汪藻

謝知建康府到任表

李光

重修神宗皇帝實錄校進表

趙鼎

謝到潮州安置表

趙鼎

謝賜歷日表

張擴

謝賜歷日表

張擴

代賀受降表

翟汝文

越州謝降官降職表

翟汝文

再致仕謝表

張綱

謝除御史中丞表

沈與求

謝講和赦表代岳少保武穆遺文

張節夫

謝授建康府安撫并廬壽宣撫使表代葉少蘊

王之道

進先公文集表

胡寅

賀直河引回河勢表

程俱

進新修紹興勅令格式表

程俱

謝除都督江淮軍馬表播芳文粹

張俊

進中興記表宋四六選

耿延禧

辭免宗正少卿乞賜罷黜狀

胡銓

遺表

胡銓

南宋文範卷二十七

長洲顧少卿先生鑒定

秀水莊仲方編

表

謝除邇英殿說書表

楊時

臣某言伏蒙聖恩除臣充邇英殿說書尋具狀辭免奉聖旨不允者備員東觀曾未逾時講經宸庭薦膺異數懇辭上瀆成命弗渝省分非宜以榮為懼中謝伏念臣仕惟為祿學不知方自憐挾策以亡羊奚殊博籥幾類畫墁而志食有愧輪輿拓落一官踐更三世偶以桑榆之晚景親逢睿聖之誤知擢賓書林復陪經幄嗟伏生之已老徒誦遺編顧申公之無文寧堪待問此蓋伏遇皇帝陛下至仁天覆盛德日新雖小善而不遺無一夫之弗獲致茲庸陋亦預甄收非堯舜之道不陳敢忘訓獎惟虞夏之書具在益懋前修期自竭於埃涓庶或逃於尸素

謝除資政殿學士宮祠表

許翰

鞠躬避位議不震于明庭禪服奉祠職尙聯于祕殿蒙恩過望銜
感何言中謝伏念臣身事四朝志窮一節頗闕易象春秋之遽欲
明道數治亂之原老矣何施枵然難用三以倉皇而去國皆由迂
闊以干時逮聖武之勃興參羣英而迅召冀摠淺陋得佐艱虞顧
忠力之未陳已衰疾而難強自傷奇薄不副登崇敢云酌損之時
更冒褒嘉之福徘徊聖念形爲恩禮之繁隱閔情顏歎失功名之
會銘心莫報雪涕無從此蓋伏遇皇帝陛下道德祿微神明基祚
方收俊乂往濟經綸謂葉公好畫而致真龍取燕昭市骨而來駿
馬故寵光於一介以風示於多方臣敢不思效涓塵懷忠獻歆續
訪落之頌庶冊書永燦於王勳反招隱之詩使草莽咸知於帝力
宗澤

乞回鑾表

臣聞君陳之尹東郊深勅謀猷之告后宋璟之守京兆極明得失
而進言皆所以啟沃君心箴規政闕矧荷聖神之知眷有懷宗社
之安危敢忘斧鉞之誅仰瀆冕旒之聽中謝竊以天子居九重之

奧窈非務蒙塵京師爲諸夏之本根當思奠枕倘值艱虞之會未
詳利害之幾或輕萬乘以遠巡致駭四方之羣聽則本根斯弱華
夏奚安遠稽唐室之浸微實乃商鑒之可擬越自運啟炎宋卜都
大梁宅中而包三萬里之幅員創業以貽二百年之基緒重熙累
洽端拱垂衣非緣三歲之親祠曷見六龍之遠御曩值澶淵之寇
或陳楚蜀之巡賴有直臣卒排異議星奔一鏃膽落四夷豈圖姦
蠹之擅朝繼被羯胡之猾夏二聖旣以北狩中都幾至內訌所幸
人無離心市不易肆日復眞人之繼統心傾我后之來蘇果致宗
廟降靈上穹悔禍皇帝陛下天縱上聖運叶中興載纘璇圖增光
火德親屈鑾輿以冒犯霜露躬整師旅以殄滅犬羊然行在久留
于別都清蹕未回于魏闕逆胡尙熾羣盜繼興比聞遠近之驚傳
似有東南之巡幸此誠王室安危之所繫天下治亂之所關仰祈
聖慮之深詳宜戒屬車之輕動且以中國之倚恃實惟兩河之盛
疆前自虜騎長驅列城畏遁獨懷忠憤糾進義兵力抗賊鋒率多

俘誠然久闕王師之助援已深民庶之睽疑近者雖時遣將徂征
渡河深入尙闕膚公之奏先傳南幸之音慮增四海之疑心謂置
兩河于度外因成解體未諭聖懷倘胡人乘之而縱橫則中國將
何以制禦臣叨膺委寄代置留司茲緣密託于雲天偶遂救靈于
畿甸遽報翠華之移幸深虞中外之難安願罄孤忠冀回淵聽昔
奉春委輅建策猶止洛陽之都張禹驛馬抗章尙返江陵之駕矧
丁聖世曷愧前修伏願陛下秉虞舜察言之明體成湯從諫之聖
輟巡南服回駕汴都以安東北兵民之情以慰溥率雲霓之望則
神人悅豫夷夏謐寧邊陲指日以肅清盜賊不令而衰息咸資睿
斷用杜危機瀝悃扣闈罔避龍鱗之觸傾都拭目佇迎天仗之還
願俯徇于愚誠誓益堅于忠報臣無任

遺表

建炎二年七月

宗澤

心期許國每輸扶厦之忠死不忘君猶積戀軒之意魂魄將離于
形體精忱願達于冕旒中謝伏念猥以朴忠受知淵聖擢自困躓

羈窮之際付以寇虜往來之衝適遇陛下出總元戎察臣粗著榮
效坐籌密計俾臣得預屬僚逮夫踐祚之初首錄孤危之迹寇攘
未泯誓爲淮甸之巡宗廟斯存委守留司之鑰力小任重志大心
勞誓殲羯胡再安王室但知懷主甘委命于鴻毛無復偷生期裏
尸于馬革夙宵以繼寢食靡寧斯民獲奠枕之安胡馬無飲河之
意事爲紛至屢勉惟多回視頽齡已迫桑榆之晚景益堅素節每
期松柏之後彫豈謂餘生忽先朝露尙扶病以治事敢愛己以顧
私陰陽之寇游深藥石之功莫效少延殘喘庶畢願言昨有招安
到楊進等約其眾多無慮百萬昔嘗爲寇頗聚眾以震師今已革
心欲爲國而戡難足踵道路雲集都城已涓吉而戒塗擬成功于
指日干戈未舉舟壑忽移神爽飛揚長抱九泉之恨功名卑劣尙
遺千古之羞仰憑睿眷之深必無生死之異囑臣之子記臣之言
力請回鑾亟還京闕上念社稷之重下慰黎民之心命將出師大
震雷霆之怒救焚拯溺出民水火之中夙荷君恩敢忘尸諫顛印

法座無由再望于清光枯朽微生從此永辭于宸扈臣無任

謝許侍養表

播芳文粹

胡安國

瀝懇計私自投誠於君父蒙恩賜可獲其職于庭闈仰報矜憐唯知拜舞伏念臣未能自信何所取材濫陪入彀之英徒急抱關之祿光陰荏苒蹤跡飄零膳羞多闕于旨甘晨夕少諧于定省祗膺嚴命感激愚衷叱馭戒塗夢寐碧雞之佳境牽衣結戀徘徊烏鳥之深情矧當喜懼之年深計短長之日臣而留令無所逃誅子或委親亦將安用况鮮友恭之助已驚血氣之衰因露悃悃冒干旒展幸逃嚴譴仰奉俞音伏遇陛下孝通神明德配高厚崇八行之舉於以明倫凡一物之微悉皆得所俯念服勤之請俾安就養之方施等邱山命輕草芥臣敢不盡心明善務本爲仁羞菽水以致歡餓體膚而弗悔學如未至更殫早夜之思忠或可移終有糜捐之地

謝罷給事中表

播芳文粹

胡安國

宿疹沈絛稽違成命巧詞彈擊寢罷新除威邇在顏感深銘腑伏念臣稟資至陋得數多奇徒險阻之備嘗未悔尤之能寡早年擢第歷仕四朝晚歲蒙休叨官三省值強虜憑陵之際輸從臣獻納之規頻觸權豪坐貽澄斥開闢千里慘淡百憂但驚疾病之益侵豈復恩榮之敢覬寶圖有永神武中興得人欲濟于艱難取士不遺於羈散召自荆扉之陋超居瑣闥之華劍佩相磨風雲初合自嗟薄命獨負危疴恐顛踣於道塗遂傾祈於旒展未回隆渥已嘖煩言假如侶楚澤之蟲蛇託生蝸舍孰若罷周行之鴛鴦平奏鸞臺身陪鳴玉之班腰束黃金之賜本非失性素不病狂忍于慢令之刑乃要流俗之譽毀深銷骨自昔興嗟德大包荒於今爲幸伏遇皇帝陛下堯仁天覆湯聖日躋廣施雨露之恩特霽雷霆之怒俯憐孤跡免寘天懲敢不念切知非動思觀過處衡茅而守約勤藥石以扶衰謂不謹前益當善後廢而可起倘溝壑之未填志或稍伸冀涓埃之能效

賀收復湟州表

葛勝仲

爰整其旅起舊將以徂征克成厥功恢故疆而盡復捷音來上歡
頌遠傳中賀竊惟湟水之封陲實邇橫山之走集地形控扼天聚
富繁歸我版圖昔有招攜之效弛其檻縶誰為縱敵之謀屬聖武
之紹興幹神機而獨運星文助順軍氣益張匪安匪舒遂有來鋪
之效是致是附坐收無侮之功恭惟皇帝陛下遁求厥靈載用有
嗣赫赫業業而天威遠愴烝烝皇皇而兵勢具嚴憬彼邈川固無
勞於折箠蠢茲僞夏行亦見於消烽

謝除知福州到任表

張守

召還經幄猥荷記憐就易藩封謬叨委寄布宣聖德慰諭遠民皆
云遣政事之舊臣可以識朝廷之至意望雲仰戴夾道歡呼始拜
命以兢惶既入疆而感涕中謝惟昔甌粵險遠之地為今東南全
盛之邦八郡分支封圻廣袤三山鼎峙形勢尊雄向由劇盜之震
驚尋苦戍兵之供億公私垂罄井邑就荒加以田疇亢旱之餘仍

當海嶠防秋之日宜有撥煩之略以為善後之圖伏念臣才歷試
而不長命數奇而寡與政圖三載會莫紀于勳勞輔郡兩時亦未
聞于課最既遠譴訶之域遠陪清燕之閒第迫病衰力祈退縮豈
謂中宸之眷復分南顧之憂不敢固避以貽擇事之譏尚期力行
以勉報德之效此蓋伏遇皇帝陛下廓蓋容于天地躬勤儉于家
邦明以見幾仁不遺察念臣久侍帷幄知勤郵之為先憐臣嘗備
藩維粗安靜而不擾濬發獨斷申加茂恩再念臣本出睿知最為
孤藐粗由直道不敢愛身顧惟閩中稍遠行闕俗既織畜以趨利
士多請寄以為姦固當守法奉公以絕貪冒之私不敢違道干譽
而懷畏避之計專求民瘼以固邦基諒無遠而不聞幸容光之必
照挾知馬問羊之術雖愧昔賢易帶牛佩犢之風願師循吏

謝賜對衣金帶鞍馬表

張守

討論潤色已懼空餐衣被服乘更蒙蕃錫冒寵章而增悻超禁路
以知榮伏念臣久安龍具之貧居豈識蟻封之試足羈孤寡援誰

憐范叔之寒災禍冥心久悟塞翁之失竊重金之顯服跨沃轡之名駒病骨支離睿恩優渥此蓋伏遇皇帝陛下仁而徧物哲以知人駿骨而市千金灼知誠意狐裘之非一腋務盡眾長乃捐在笥之珍曲示解驂之惠臣敢不仰思藩飾俯効馳驅束帶而使與言倘不愧搢紳之列據鞍而示可用庶幾逃負乘之譏

賀建築隆兌州城寨表

汪藻

申畫封圻域彼要荒之遠列爲郡縣赫然亭障之新方用夏以變夷旣由中而及外同諸近服錫以嘉名伏以天下一家王者必期於無外日闢百里聖人務斥于提封惟茲生聚之毗自昔羈縻之域采入其阻往城于方我陵我阿不以山谿之險有民有社在吾邦域之中來稱都護之觴增廣職方之籍疆以周索達于海隅樓櫓相望雖廣谷大川之異制書文混一豈故家遺俗之有存坐成形勝之區無復華離之國恭惟皇帝陛下神武不殺聰明有臨成乎安疆聲教極舟車之至同其貫利畏懷無鏃矢之遺坐令種落

之居皆置朝廷之吏用充國金城之略過伏波銅柱之封幅員旣長錯地形之如繡財賦底慎哀方物以來琛同我太平惠于中國臣等幸逢休運親睹膚公守在四夷已抱襟喉之勢對揚萬壽願陳江漢之詩

謝除顯謨閣學士表

汪藻

臣藻言準告一道伏蒙聖恩以臣編次徽宗皇帝詔旨進書了當特授臣顯謨閣學士尋具辭免蒙降詔不允者蒐求載籍僅輸掌故之勞越進通班益玷承明之選蒙隆施之洊及懼小器之難勝伏念臣少則嗜書老而憂國念廣記備言之所載雖諸侯小國以猶傳豈承萬世之丕基迺缺一朝之信史因露章而有請蒙給劄以兼收周旋雖閱于七葦綴輯敢忘於一日多識漢事徒竊慕于蔡邕續成晉書誰見推于陳壽豈意奏篇之瀆遽叨增秩之榮茲蓋伏遇皇帝陛下繼體守文奉先思孝旣皇皇追慕望鼎湖弓劍之還宜汲汲纂修求石室圖書之備明詔周詢于海內遺編悉上

于史官方博見聞一新凡例而臣夙蒙眷委適就編摩固難追補于螭頭幸已獲臻于麟趾爰冒塵于乙夜俄超擢于西清仍許乃僚亦同茲賞臣敢不誓殫樸學仰稱明恩問周穆王之詩庶無慚於子革上段太尉之事當更採于宗元

謝轉官表

汪藻

投閑得請常懼空餐會課當遷復叨信賞誤大恩而莫報持餘日以安歸伏念臣去國九年奉祠兩任生平慙直不隨世俗以雷同歲晚棲遲乃望君門而雨絕孰云磨鈍之具俯及養疴之臣茲蓋伏遇皇帝陛下總攬權綱躬膺歷數宵衣旰食十年不廢于憂勤寸地尺天一日悉歸于覆載冠帶萬里刑賞百工而臣投老江湖俟填溝壑陪議論阜衣之後雖愧名官奏絃歌清廟之初敢忘抒頌

謝知建康府到任表

李光

臣某言伏奉詔命除臣端明殿學士左朝奉郎江南東路安撫大使兼知建康府充壽春府滁濠廬和州無爲軍宣撫使尋具辭免伏蒙降詔不允臣已于閏月十一日到江南東路界首交割安撫使牌印二十一日到建康交割本府執事訖總華省之三銓久慙尸素抗戎旃于兩路更冒寵榮撫已無堪循涯有愧中謝伏念臣稟生窮苦涉世闊疏剝聞前哲之緒言粗識人臣之大節備論思之職茂聞獻替之能操啟擬之權罔著公方之譽叢謗讒而銷骨積憂患以薰心雖上無投杼之疑而臣有履冰之懼忱辭屢貢敦諭益勤拜君命于大庭欽承德意窺王言于詔綍祇服恩私用勉策其疲駑庶仰分于憂顧任隆力小感激涕零此蓋伏遇皇帝陛下天度無私海涵莫測務廣招賢之路協成恢復之功謂臣樸忠稍知于勤瘁察臣孤立曲被于使令兼撫江淮之封盡付兵民之寄金陵會府江左奧區承頻年兵火之餘適千里流亡之後招攜懷遠撫循必以寬恩折衝銷萌經畫乃其餘事臣敢不仰遵睿訓益懋遠圖說禮敦詩蓋嘗聞於卻縠拊眾威敵當勉效於穰苴庶

彈犬馬之勞少答乾坤之造臣無任

重修神宗皇帝實錄校進表

趙鼎

臣聞三代而上堯舜禹湯文武之相傳五伯以還秦漢魏晉隋唐之殊襲不有經史孰鑒興亡故歷代官有其常俾後世信而可考中謝恭以神宗皇帝躬剛健篤實之美稟聰明睿知之資志大有為功收不宰布諸典策燦若日星逮紹聖之改元彼日錄之來上假名繼述公肆詆欺盡虛美熙寧變更之臣反歸坐元祐謗訕之罪用以脅持于上下豈惟攘竊其猷為人不敢言史成此禍忠臣義士抱懣積年仰惟陛下肇開中興克紹先烈雖干戈未定居嘗憤記史之誣而歲月浸深大懼失貽謀之實載頌明詔復俾儒臣念茲皇祖之彌文有待翼子之所燕臣謬膺揆路兼領史權猥資僚屬之能獲與纂修之首朱書新錄墨本舊文凡去取之不同皆存留於考異詳原私意灼見姦言初憂頭白之無期不謂汗青之有日百端牴牾一切編摩告功合雅頌之稱尊王法春秋之旨大

君有命銳然成不刊之書小子何知例以為不急之務允矣七閩之業大哉萬世之謨願乞乙夜之觀益見後昆之裕油雲霑雨曾不須臾白日青天終難掩蔽所有神宗實錄二百卷并考異二百卷謹繕寫成冊除已各先進五十卷外其餘卷帙謹隨表上

謝到潮州安置表

趙鼎

省躬知過宜湯網之不遺屈法施仁荷堯雲之曲庇徒知幸免何以自容中謝伏念臣才不通方力難任重冒竊寵靈之久積成釁戾之多屢揣分以祈閒亦蒙恩而賜可而臣憂患踵至羸瘵日增始抱疾以還家即銜悲而哭子齒髮凋瘁于感傷之後精神昏耗于驅馳之餘其誰為之無足憐者載念百為之俱謬寘之九死以奚逃自信直前安處危機之上執迷不返卒投罪罟之中幸沐洪私止流荒裔聞命就道寧辭險阻之備嘗杜門省愆更覺悔尤之自取噬臍莫及流涕何追此蓋伏遇皇帝陛下天度并包離明旁照曲全體貌獎勵臣工憐臣簪履之餘嘗叨顧遇察臣桑榆之暮

不足誅夷臣敢不上體不殺之仁益勵自新之志身留瘴海分甘老於漁樵目斷雲天心永傾于葵藿

謝賜歷日表

張擴

臣某言歲月日時無易天以人占治教政刑始和下從上令用頒實歷申戒彝章凡暨有邦咸德其賜中謝恭惟皇帝陛下至誠盡物之性內直與天為徒春賞秋刑順陰陽而為用聲律身度如權量之不公昭示王正克修祖武內以謹日官之職外以孚海宇之情臣叨領郡符仰承德意履端舉正莫窺天下之至神作事厚生猶識古人之大戒

謝賜歷日表

張擴

臣某言以初為常仰稽天運履端於始俯授人時頒及遠方咸知德意中謝竊以璇璣觀象在日月星辰之度不差鳳歷紀元於分至啟閉之候尤謹非推步能撮其樞要則授受或差之毫釐唯聖為能後天而奉豈止舉行夫故事實亦開悟於斯民茲蓋伏遇皇

帝陛下剛健法乾昭融如日居成功而弗恃格有孚于未占遂嚴正朔之頒以示邇遐之信臣敢不虔恭以守兢慎而行鼓舞雷風但稟神明之布令出入阡陌更知勸課之及時

代賀受降表

翟汝文

伏睹制詔出師問罪西羌擒首領轄正臧精布固等并青唐隆贊兩國納土乞降建西安州等皇帝御殿百官稱賀者於鑠王師恭行天罰執訊獲醜大詰於戎兵取亂侮亡不殺之神武肅陳環列之衛昭舉受俘之儀中賀憬彼種羌舊為漢塞屬中原之雲擾顧西夏之日攘棄山川于外區荒土田于異域篤生上聖坐奠九躔究觀輿地之圖大斥河湟之境皇天既付中國亂越我家維后克綏厥猷有指疆土孰云小醜欲事故常遣將受成選徒出狩戎車既飭王征有聞以無聲猶賊就擒天網雖疏而不漏綏厥士女取彼凶殘既戡定以畢來曰旋歸而振旅辟雍獻馘適睹在泮之虎臣晨樂告成六合凱旋之金奏然而震威以明伐叛宥罪以廣好

生終從蠻隸之歸爰貸橐街之戮恭惟皇帝陛下日躋獻聖天錫
智謀繹茲先後之迷制乃短長之命其誰狡眾敢拒大邦以萬民
惟正之供用設都于禹之績凡四方有辭于罰惟簡在上帝之心
雖曰示威豈其贖武卒裕陵之伐成寧考之圖功薦清廟之勳在
武丁之孫子是惟無競疇有不承臣等雖云機政之間蔑預理戎
之略案圖積石已窮漢使于河源布度明堂復繼周書之王會

越州謝降官降職表

翟汝文

臣某昨緣本州荒旱民力彫瘵臣遂急先減放貧弱下戶和買絹
一面奏聞奉聖旨依奏致本路轉運判官吳昉劾奏臣不合將下
戶絹擅自減放奉聖旨特降兩官者續又為杭州軍賊作亂臣首
先提兵五千人渡江誅討一面奏聞奉聖旨委提刑司節制其提
刑武臣高士瞻力欲招安不肯會合奉聖旨令臣分析因何不至
杭州城下臣分析昨首先提兵至城下並無兵將與臣會合獨臣
一軍與賊搏戰再奉聖旨特降充顯謨閣直學士者行事不請自

干矯制之刑為將無功重抵失期之罪拊心自悼大戮所加敢謂

隆私止從降秩

中謝

伏念臣叨臨劇郡實任牧民當上聖總戎之

初屬二帝蒙塵於外遐方倣擾眾志易搖西有倪賊之未誅東有
方寇之餘黨征徒潰散羣盜繁興若催科之不聊則圖視而俱起
臣所為輕捐州郡之租賦乃以重保朝廷之士疆敢若秦人坐視
越人之瘠既安劉氏理知晁氏之危迺者變起叛兵禍纏隣境臣
躬提眾往不俟詔行徑度濤江進襲賊壘於時詔令節制盡委憲
臺貪幸招攜之功止臣誅討之計退思避敵翫寇喪威獨臣孤軍
誰與會戰雖捐軀當矢石之難不避夷傷而以賊遺君父之嫌敢
逃刑戮尚寬憲網復畀守符恭惟皇帝陛下捐利與民力行施舍
擇人任將倚以折衝察臣違命而愛君知臣督姦而為國以謂大
夫出疆而利社稷許以便宜公侯干城而為腹心欲其守衛庶令
方面之寄仰賴聖朝之公臣敢不益勵初心無忘上眷顧愚衷之
必竭愈自信以不疑觀過知仁已諒放廢之失見危授命尚收汗

馬之勞

再致仕謝表

張綱

臣某言近緣年老多病陳乞致仕今月十八日伏奉告命蒙恩特授臣左太中大夫依前充資政殿學士致仕臣已即時望闕謝恩祇受訖陳力不能屢上乞骸之請推仁從欲更叨增秩之恩身既返於田廬職尚聯于禁密始終厚遇朽謝奚堪臣某誠惶誠恐頓首頓首臣聞禮存致仕之文國重憫勞之典乃治古優賢之遺意實人臣歸老之至榮苟非其人未免有愧如臣者起家寒賤遭世盛明受寵三朝效官四紀晚荷非常之眷召從得謝之餘俾再仕于清時已為忝冒自貳卿而聞政更極超踰上焉累世蒙休下則舉宗被澤逮辭疾而去位猶分符于善邦凡茲寵數之優隆皆過平生之分量報未先于糜隕年遽迫于衰殘自知無補于公家豈敢坐糜于稍廩是所退屏以苟生存睿聽俯回既特從于至懇官聯序進仍曲示于殊私顧終身無尺寸之伐可稱而未路荷保全

之恩如此慙顏莫寄感涕交流茲蓋伏遇皇帝陛下博愛而行義之宜至誠而盡人之性知臣樸直少無能而老亦何為察臣衰病心雖勤而力有不逮俯憐舊物特昇殘生息駕駑駘雖戀軒而無路懷忠賦猶結草以為期臣無任

謝除御史中丞表

沈與求

一節造朝已玷持書之舊十行錫命遽叨執法之榮危懼上陳温言狎至覲顏就列攬涕知慙中謝臣竊以風憲之司政事所繫臺綱正則百度舉國論定故羣慝消專務抨彈寧容畏忌必也深達治體更練事情本之以仁厚愛物之誠加之以正直事君之道身任眾怨屹如柱砥之鎮頽波言切上心沛若巨魚之縱大壑俾率其屬克大厥官伏念臣多病早衰少徒寡與叨蒙異睠祇罄孤忠危哉樓子之言將其扶于公道甚矣汲黯之戇嘗自觸于駭機一去天墀甫更歲鑰再從下澤歸觀清光心驚伏馬之鳴初疑昨夢目駭臺烏之集復守故棲空貽尸素之譏敢有超遷之望忽傳明

命驟躡峻班寵過食浮莫遂循牆之避位高責重更深臨谷之憂
此蓋伏遇皇帝陛下自誠而明能哲而惠羣策屈羣力並輯謀猷
之良公事當公言兼收聽納之美察臣論每專于國計憫臣志獨
緩于身謀出自親除就加器使臣不敢益堅素守仰稱殊私明目
達聰方廣求言之路摩頂放踵盡是報恩之身

謝講和赦表

代岳少保武穆遺文

張節夫

武勝定國軍節度使開府儀同三司河北京西路宣撫使兼營田
大使臣岳飛上表言今月十二日准進奏院遞到赦書一道臣已
卽躬率統制統領將佐官屬等望闕宣讀訖觀時制變仰聖哲之
宏規善勝不爭實帝王之妙算念此艱難之久姑從和好之宜睿
澤誕敷輿情胥悅臣飛誠懼誠抃頓首頓首竊以婁敬獻言于漢
帝魏絳發策於晉公皆盟墨未乾顧口血猶在俄驅南牧之馬旋
興北伐之師蓋強敵不情虛詞無信莫守金石之約難充谿壑之
求圖暫安而解倒垂猶之可也願長慮而尊中國豈其然乎恭惟

皇帝陛下大德有容神武不殺體乾之健行巽之權務和眾以安
民迺講信而修睦已漸還于境土想喜見于威儀臣幸遇明時獲
觀盛事身居將闔功無補于涓埃口誦詔書面有慚于軍旅尙作
聰明而過慮徒懷猶豫而致疑謂無事而請和者謀恐卑辭而益
幣者進臣願定謀于全勝期收地于兩河唾手燕雲終欲復讎而
報國誓心天地當令稽顙以稱藩臣無任瞻天望聖激切屏營之
至謹奉表稱賀以聞臣誠懼誠抃頓首頓首謹言

謝授建康府安撫并廬壽宣撫使表

代葉少蘊王之道

竄身藪澤方念咎於桑榆授鉞江淮忽拜恩於綸綍功難補過愧
不勝榮中謝竊以刺史之奉六條首除強暴漢安之遣八使專選
威名或持斧以戢奸或埋輪以懲惡或褰帷而人爲之震慄或攬
轡而志在於澄清悉能致盜賊詣營而乞降豈但使守令望風而
解去眷茲新命創自本朝望欲重于列城故非前世浩穰之地則
不置聲欲先於羣寇故非近時輔弼之臣則不除惟建節之雄藩

寶臨流之都會面橫赤壁背負烏江州分淮海之區星直斗牛之
次肇三方之鼎峙更六代之龍興舟車所通衣冠攸集在宣池寄
股肱之郡於廬壽亦唇齒之邦肆法駕之東巡逮金人之南渡川
原遍赤草木皆腥今將舉郡邑而一新且復扶邦家於再造驅攘
蜂蠆撫養瘡痍興仆植僵折衝厥難授以一方之巨屏俾爲萬里
之長城必能慰安民情庶幾稱職誠欲布宣德意在任賢伏念
臣智不足以周身才未至于聞道眾人欲殺事難辨于竊鉄累聖
優容理獲伸於伏劍常恐鑠金之謗積成銷骨之冤豈圖眷知擢
實樞道當奸臣之跋扈有乖明哲以自全洎元惡之殲夷遂至糾
彈而其棄尚幸覆盆之照偶逃擢髮之誅邱壑三年干戈九死僅
存餘息獲見中興十國爲連敢希元帥一麾出守遂鎮名藩此蓋
伏遇皇帝陛下與物爲春配天其澤赦過宥罪盡從雷雨之施藏
疾納汗大廓山川之度用人惟已因能任官起臣于寂寞之濱處
臣以繁劇之職責其後效以蓋前愆臣敢不夙夜在公黽勉從事

願同猛獸保藜藿於深山不使明時致豺狼於當道

進先公文集表

胡寅

臣某言臣弟太常丞寧輪對奏事伏蒙聖慈宣問乃父既解釋春
秋尙當有他論著其具以進者宸衷尙舊故老形思訓釋典文夙
簡淵深之記遺餘篇翰更蒙清燕之求中謝伏念先臣早捐塵事
志希任道謀不爲身心遠地偏守陶廬于三徑人憂已樂甘顏巷
于一瓢吟咏情性而無雕蟲篆刻之爲交際往來而乏竿牘苞苴
之智中經俶擾多所散亡晚獲莫居僅成篇帙精忠皎皎每提撥
亂之綱莊語諄諄多闡濟時之用進則傾輸于君父退猶關說于
公卿壯懷投老而益堅弱齒抱疴而彌勵自期有補終冀一伸邱
木成陰雖鬱春秋之志囊書奏御何殊旦暮之逢此蓋伏遇皇帝
陛下典學裕身崇儒化俗華袞豈惟一字緇衣不聞于十年乃
因仲息之對揚錫以溫綸之清問斯文不墜多士流傳臣謹已校
定舛訛分成門次爰從傳置進備覽觀函斂有光旣徹斗牛之象

浦珠無類合供旒冕之須

賀直河引回河勢表

程俱

神書受圖灼見乂安之理河宗率職默消平盜之虞是謂先天而不違故茲無遠而弗屆事超邃古德被函靈中賀臣竊以底柱既通世仰龍門之績宣防是築古傳瓠子之歌然皆曠日以計功固已厲民而告病故櫛風沐雨曾席突之未安而菑隄噴林悼菱薪之不屬未有獨見五明之上潛回四瀆之宗不踰指顧之間昭合運量之素夫為之于未有者上德之明訓而行其所無事者神禹之大猷顧茲不恃以為功則亦孰窺于行迹以方前載益顯妙庸此蓋皇帝陛下德合二儀澤流諸夏王道大順合百川而東之神化無方格九穹而上應儲精于內誠意已孚雖老于河上之人皆聚觀而太息顧由此地中之勢蓋莫測于神休用成九折安流之功同符萬世莫大之利臣等無施涓露獲覩祥釐負龍馬之圖將見帝鴻之錄上詞人之頌更追天保之誠

進新修紹興勅令格式表

程俱

臣聞政有忠質文之異尚所以採時典有中輕重之不同期于止辟顧因循之或敝繫損益之可知苟惟膠柱而弗更則亦推車而或泥恭承睿旨欽恤祥刑鉛槧非才簡書趣備臣某誠惶誠恐頓首頓首竊以制而用之謂之法推而行之謂之通故上有道揆以盡通變之宜下有司存以嚴法度之守至若畫衣冠而不犯是謂帝王之極功垂象魏于始和式敷邦國之常憲載在三尺行之萬方倘非可大之規莫應無窮之緒永惟嘉祐之盛實續太平之基人咸阜安政本忠厚罰疑從去恢然綱舉而網疏令出唯行捷若置郵而傳命不承有在洪烈備陳政和以來彌文具緝寬恤之詔屢下奇它之日寢煩適觀厥成亦克用乂著為律而疏為令既積日以增多歲有會而日有成又續書而不一逮此艱難之際收之煨燼之餘國之將興理若有待恭惟皇帝陛下厲精求治嘗瞻濟時深惟溢水之防不忘朽索之馭省堯方于五載豈惟禮物之修

約漢法之三章益邁寬仁之德俾致欽于明罰蓋無事于滋彰庶
幾合古以便今亦將易避而難犯所慚鈞撫莫副哀矜臣等今將
云云

謝除都督江淮軍馬表

播芳文粹

張浚

賜斧專征蓋求人望揚庭孚號誰料臣愚控避無從省循知懼伏
念臣天資任已眾謂寡謀趙北燕南雖愧風聲之慷慨吳頭楚尾
粗更牧圉之周旋每憐拊髀之憂消自覺據鞍之已老壯心徒在
綿力既愆當國家多事之時值神聖有爲之主人思奮厲臣肯懷
安所虞薦康瓠於鼎鼐之陳必有駕鳴鳩於霄漢之誚奪乘何悔
辱命爲憂自承制誥之頒未省聽聞之誤磨鉛策蹇夙夜以思食
蘖飲冰進退維谷茲蓋伏遇皇帝陛下臨朝獨斷立賢無方謂臣
結髮于邊陲粗識三軍之情僞察臣致身於公傳必同一體之戚
休起自里居俾承人之臣敢不激昂晚景報稱殊知趙將軍八十
九而習羌情願罄老臣之肺腑漢天子十八萬而建武節會來醜

虜之梯航

進中興記表

宋四六選

耿延禧

參大府之末僚建明無補記中興之盛事潤色非長強勉成篇兢
慚罔措竊以乾元首出庶物佑下民而作之君上帝鑒觀四方有
大德者得其位洪惟巨宋嗣有真王謹德而四夷咸賓干戈不用
允治而萬世永賴年穀屢豐遭奸臣變更之餘至國制搶攘之後
幾及詩人小雅之變惟思創業大風之歌金國肆殘暴之威彼萬
方並告於上下皇天有恢復之意俾一人輯寧于邦家始緣五利
以和戎繼長萬夫而建帥暨經大變迄有成功恭惟皇帝陛下湯
勇自天堯仁因性聰明睿知而不殺剛健篤實而日新初臨銅馬
之營推心而不二逮出靈武之使修睦而無疑崇臺定三箭之祥
朔部有兩王之號乃大呼而起義勃興虎變之交至進勸之交章
肇正龍飛之位務面者欲雪大恥左袒者感懷舊恩君萬邦而百
官是承惟天祐于一德賚四海而萬民悅服惟民歸于有仁雖險

阻艱難之備更蓋損益盈虛之有待念淵聖逡巡而臨遣與陛下
英銳而請行錫玉帶乃傳國之祥合春冰乃受命之始凡漢廷之
迎代邸與靈武之奉肅宗歷觀人鬼之謀參考符瑞之應行軍集
諸將之議定策聽老臣之謀事有初終迹存首尾障狂瀾于既倒
孰知崇論宏議之所繇揚偉績于無前要明盛德大業之初起當
于文官鉅儒而求鴻筆乃以帥幕舊屬而及微臣伏念臣本乏才
能但緣遭遇頃叨後乘蓋捧辟書畫預兵戈之謀夜陪樽俎之樂
辱褒音之屢及認眷獎之彌隆子犯負羈縲而從文公固顛愚而
有罪鄧晨以圖讖而知光武常精白而無它故茲流落之餘獨荷
恩憐之及顧臣淺陋何所發揮然臣聞建元大始之施為馬遷過
于矜夸至天下以為近謗建武中元之符慶史官不容撰集故來
世罕得傳聞至臣一介之微乃有千齡之會摹寫乾坤之大自揆
難工攀依日月之光徒知盡力忘其無識狂則有餘

辭免宗正少卿乞賜罷黜狀

胡銓

右臣竄逐嶺海垂三十年太上脫臣於鯨波百艱千險之中陛下
起臣于虎口萬死一生之際官九遷于一歲任六押于七旬方犬
羊抵巇之時肆蛇豕薦食之毒九重有不安枕之慮萬姓銜共戴
天之冤臺諫痛哭以陳辭忠鯁拂膺而飲恨事至於此臣亦何顏
是敢輒貢狂言屢嬰鱗逆身寧瀕於九死心實愧於三閭方伏鎖
以待斧鉞之誅敢自意得雷霆之怒尚叨厚祿猶竊美官雖聖
神曲賜於保全在臣子難安于愚分惟望天慈特賜復竄嶺海以
為人臣不忠之戒謹錄奏聞伏候勅旨

遺表

胡銓

有生必死何足動心無路報恩實不瞑目興言氣鬱戀闕神馳竊
念臣奮自孤生早陟膺仕不識忌諱自取顛躋太上赦臣於萬死
一生之中陛下擢臣於九卿六官之列曾何補報徒積罪尤久違
闕廷待盡田野屢昇真祠之逸復叨秘殿之崇收召節以遂其愚
許挂冠以優其老身塗草野雖自誓于生平命在膏肓恨不獲其

死所強支微喘更畢餘忠伏願皇帝陛下舍己從人安民和眾大
齊襄復讎之義監周公無逸之書任忠直之士而勿親便佞之人
守祖宗之法而勿聽紛更之說益堅初志懋建豐功混吳越於一
家壯基圖於萬世臣莫瞻九陛行卽三泉相如草封禪以貢諛切
所不敢張巡爲厲鬼以殺賊死亦不忘

南宋文範卷二十七

南宋文範卷二十八目錄

謝除參知政事表	史浩
進論語口義表	史浩
代忠宣公饒州謝上表	洪邁
國史院進三朝正史帝紀表	洪邁
謝除直祕閣表	王偁
<small>東都事略</small>	
天申節賀表	朱熹
謝歷日表	李石
謝賜銀合臘藥表	周必大
廣東提舉謝到任表	楊萬里
代進光宗御集表	王子俊
謝放罷表	韓元吉
謝參知政事表	樓鑰

謝除江淮都督表

衛博

進東都紀年表

王炎

潼川路安撫到任表

魏了翁

再辭免知潭州表

魏了翁

謝周程三先生賜諡表

魏了翁

謝宣召入院表

真德秀

江東漕到任表

真德秀

進大學衍義表

真德秀

辭免直徽猷閣宮觀表

袁甫

賀皇帝御福寧殿表

李劉

淮西總謝到任表

李曾伯

庚寅宰執宣賜御製忠邪辯謝表

徐鹿卿

知建寧府謝到任表

趙汝騰

辭起復知州表

方岳

謝除刑部尚書表

方岳

謝郊祀慶成肆赦表

俞德鄰

南宋文範卷二十八

長洲顧少卿先生鑒定

秀水莊仲方編

表

謝除參知政事表

史浩

忱辭洊列雖已竭于愚衷溫詔俯頒終莫回于誤寵上慚主眷下
 愧師虞中謝伏念臣以一介萍梗之踪際千載風雲之會粵自左
 史亟踐西垣甫入謝于昕朝已陞華于翰苑曾無游夏淵源之學
 少助商周灑噩之文豈謂代言之墨未乾進讀之席不暖復膺聖
 擢遂與政機洪惟盛朝克肖治古體堯蹈舜方當大有為之時鈞
 渭耕莘宜得不出世之輔顧參陪於國論實翊贊於皇猷非特近
 比二轄之官蓋得與聞三省之事叨塵若此報稱謂何茲蓋伏遇
 皇帝陛下歷數在躬聰明作后裕于待士約以取人念其羽翼之
 舊臣委以股肱之事寄而臣自承顧問積有歲時雖微補袞之功
 實抱愛君之願好生天地之大德既屢誦于舊聞寢兵帝王之極

功尚力成于聖志

進論語口義表

史浩

聖人之言如天豈容意度古者之學為已務在躬行逮及漢儒傳注之興已失孔門淵源之舊況茲固陋何所發明中謝伏念臣社櫟散材蠹魚素業窮年繼晷莫希經術之名家析句分章猶有書生之習氣比歸休於故里獲畢志于遺編念二十篇藏壁之餘皆七十子傳心之妙雖迫桑榆之暮未忘鉛槧之勤再閱歲時粗終卷帙揆分方虞於僭妄吐詞曷究于精微姑欲示於來昆豈當祈于乙覽不圖眷獎許以冒聞茲蓋伏遇皇帝陛下極圓神方智之能集內聖外王之道體堯蹈舜跨商軼周經幄疇咨睿訓每宣於奧義詔書誕布羣臣莫望於清光乃容螢爝之餘亦預芻蕘之擇恭承威命弗敢固辭蠡測海而管窺天自慙卑近露增流而塵足嶽何補高明

代忠宣公饒州謝上表

洪邁

禁林浹日未遑坐席之温鄉郡一麾偶遂分符之便雖始願不敢及此豈罪人乃能得之爰奉庭闈即趨官守伏念臣生而性介天與數奇膺真主之誤知建單車而出使茹毛北海已驚半世之遷除館西河幾絕一生之望敢期天幸獲以身還方深故土之懷猥辱高門之召果聞取戾旋致疾顛上印綬以歸田固為輕典佩銀黃而夸里更沐殊恩捧檄入門過家上冢桑梓遂晨昏之養松楸寬夢寐之思行道觀瞻合宗感涕茲蓋伏遇皇帝陛下合德天地玩心神明常思四表之歡不錄萬里之過而臣空行空反曾蔑效於秋毫乍佞乍賢尚叨榮於晝錦內而自訟其又奚言敢不上體至仁仰圖共理奉三年之計自惟無補于朝廷推一日之長庶或兼容於獄市

國史院進三朝正史帝紀表

洪邁

三后在天誕著丕謨之懿百年積德惟憑信史之傳方論次之開先仰威靈之如在載涓昧旦輒冒宸嚴臣竊以貽厥孫謀寶為大

訓必有不刊之典用扶可久之基赫赫裕陵制作擅百王之冠巍
巍哲廟規模宏七世之觀迨昭考之勃興備盛朝之盛美治安之
極剖判所無禹繼舜舜繼堯顧三聖而守一道事繫時時繫月宜
一經以垂無窮慨多歷於歲華訖未施於功緒蓋士起異同之論
而時更板蕩之餘視熙豐符祐之成舉是非而雜糅攷崇觀政宣
之志頗放失于舊聞賴故家遺俗之猶存致偉績宏休之可紀參
稽定貫允屬昌辰恭惟皇帝陛下宗祏宅心羹牆係念明烈祖之
成德以庶邦惟正之供覲文王之耿光善孝子述人之事欲壯西
箱之御趣哀東觀之書臣等自愧庸虛敢知筆削書大事而小則
箱牘願殫細素之勤藏名山而副在京師終冀汗青之望

謝除直祕閣表

王 偁

謬述一經冒徹宸旒之邃誤膺再命躡陞芸閣之華省已兢惶荷
恩深厚中謝伏念臣賦才冗瑣受學空疏蚤結髮於薦紳粗服膺
於簡策未聞儒者之六藝安有史官之三長念昔先臣少登鼎甲

忝甘泉之侍從陪南度之衣冠曾與編摩肆掌書命臣猥名牛馬
之下走敢謂箕裘之故家聞詩禮以僅傳撫箠瓢而無恙冥搜故
實坐閱歲時疊疊記錄之多寢寢編秩之廣念食芹而甚美亟抱
璞以直前上祈折衷於聖人下將以俟于君子曲荷帝心之善貸
驟加儒館之清名幸則已多報於何有此蓋伏遇皇帝陛下睿謨
天錫聖學日新事深鑒于本朝政若稽于先烈宏遠之度同符於
藝祖忠厚之澤合德於仁宗前事誠後事之師家法乃治法所出
致茲菅蒯亦與甄陶臣敢不博采舊聞仰酬洪造不與按讎之列
夢長到于石渠遠瞻咫尺之威心日馳于魏闕

天申節賀表

朱 熹

黃屋非心茂對重明之運玉卮為壽聿臨載育之辰慶叶中天驩
騰廣域中謝伏惟尊號至仁被世盛德在躬立聖政九百五條行
堯之道履帝位三十六載薦舜于天得聖人時心至愉而形至佚
為天子父貴無敵而富無倫既申命之用休宜降年之有永臣欽

逢盛旦假守偏城卽雲氣而望蓬萊阻陪拜手觀泰元之授神筭徒切傾心

謝歷日表

李石

測土圭而正影再造慶基調玉燭以分光例頒遠服式循舊貫敬奉新書恭惟皇帝陛下久則生神積而化聖日遲速而有度天後先以弗違法象得堯舜之心律歷糾漢唐之步天下用九而治既底雍熙王者奉三無私靡容僭忒臣敢不周旋邊政勸課農功入奉晨昏視桑陰而自惜出分宵旰無黍晷之或欺

謝賜銀合臘藥表

周必大

天無私覆外懷五玉之臣帝有恩言中錫萬金之劑凜乎歲晚倏爾春回伏念臣昨被綸書起司符竹考湘纍之九辯閱楚戶之三霜多病所須常求藥物十全爲上未造醫師茲逢漢宮臘飲之時乃冒唐殿銀罌之澤茲蓋伏遇皇帝陛下道遵皇極治格泰和惟疾之憂每推父母之愛好生之德更廣乾坤之仁故當凝互之辰

特有珍良之賜臣敢不勤于服食稱是恩榮候屬祁寒深察小民之怨居防美疠載思惡石之生

廣東提舉謝到任表

楊萬里

守延陵季子之墟愧無治行使南粵尉佗之境復拜恩言戴仁如天反已維谷伏念臣學非世用才不人先幼而讀書亦竊探壁中之科斗長而試吏顧安知柱後之惠文三年朝班再歲輔郡進亦思磨礪于名誼退則欲布宣於詔條訖無涓埃小補河嶽九天曉日念孤臣將遠於長安四乘秋風忽寵命載驅于原隰至於南海保彼東方惟所部十有四州去修門幾四千里物眾地大壤沃泉甘臣始入疆告厥父老上不忘遠翕然歡呼海若祝融彈壓波瀾之險朔雲邊雪驅除江嶺之氛暨于幽遐罔弗嘉靖臣以使事官於海邦煥乎榮光展也徽福茲蓋伏遇皇帝陛下不釐駿命怙冒函生日月宣精照朔南而不隔乾坤有造均雨露以無偏曾是薄材俾將隆指臣敢不輯寧凋瘵拔去姦貪出納有司豈但欲委積

茗齋之滋殖澄清當路庶幾使豺狼狐狸之一空

代進光宗御集表

王子俊

雲漢為章莫闕寶儲之彩風雷作號俾緡金匱之藏勒成一經昭
示萬世中謝竊以聖人肆筆初何意于成書天下觀文乃有功于
範俗繫隆昭代適駿先猷恭詔編摩之臣彙列昭回之次煥然可
述施及無疆恭惟光宗皇帝學富月將聖高天縱得書之體得言
之解上掩百王如日之升如月之恆下飾萬物疇昔燕閒之御從
容翰墨之場周文郁郁乎宏賁盈成之治虞書渾渾爾丕昭精一
之傳陛下聲欲廣文道能繼禹作者之謂聖敢忘繼志述事之心
得其所以書洞見經天緯地之妙肆命臣工而纂輯載揚帝典之
光華細帙縹囊寶為大訓赤文綠字皆聚此書臣等猥以謏聞膺
茲隆旨玩歲愒日空殫淺見於管闕血指汗顏采覺聖言之天遠

謝放罷表

韓元吉

彈文甚峻請從流放之科宸度兼容聊示汰歸之譴恩深命薄感
激涕零伏念臣猥以非才叨塵異眷文詞淺拙嘗蒙甚善之褒議
論闊疏屢動蓋高之聽久冒清華之選皆繇特達之知昨自典銓
復求試郡與之舊治曾無數舍之勞課以字民尚乏期年之效徒
以世霑厚祿身忝從班稍知粗抑于豪強不敢遽形于退避明目
張膽期法令之自行銷骨鑠金乃謗傷之遂積果貽清議上負明
時然臣被拔擢于州縣者餘二十年荷委任于朝廷者更十數職
寵為過分嗟有識之自知貪以徇私慨無從而可辨儻非皇慈之
洞鑒詎容小己之保全茲蓋恭遇皇帝陛下擴博愛之深仁推好
生之盛德惟天為大徧覆包涵而靡遺如日之升遠近幽深而必
照察臣性本于疏直憐臣夙勵于樸忠不忍嚴誅尚存善貸臣敢
不洗心念咎銘骨知歸迫暮景之桑榆若為報國視歲寒之松柏
所以事君

謝參知政事表

樓鑰

充貳樞庭方慙玩愒晉陪宰路遽被推遷倍深臨谷之危莫遂循

牆之請中謝竊以朝廷建輔號天子之四鄰政事參聞下丞相之一等定名稱于乾德復官制于建炎必求異能乃副隆委伏念臣顏齡景迫壯志日凋再掌吏銓但守停年之格濫居宥府未寬思職之憂雖粗竭于譟才終莫裨于末議負二宜去有七弗堪宿恙漸侵將顛天而致禱誤恩狎至真踏地以靡遑况秉鈞當軸之虛員而知印押班之分日兼與漢章之約仍從商皓之遊命服匪頒復賜天閑之駿爰田增衍更開公社之封昔在本兵尚為僥冒茲叨助理尤懼曠瘵茲益伏遇皇帝陛下盛德又新至誠樂與折衝禦侮坐底于外寧聚精會神力先于內治揀求俊乂置在弼諧聿令衰退之蹤亦忝延登之數臣敢不益殫愚慮仰贊宏規曰都曰俞願竊慕賡歌之喜知足止庶幾從告老之私

謝除江淮都督表

代

衛博

駟介乖兵未效獻俘之禮五侯九伯迺專賜履之征孰謂臣愚猥蒙制可退循牆而莫避致專乘以爲憂中謝伏念臣號令乏前賢

之風勇力廢橫戈之習年之將耄語既諳諳心之不老髮猶種種久負賜骸之願晚蒙血指之羞以宜投閑散之身護非素拊循之士蠡屯蝟聚而尚納憑陵之侮雪虐風饕而未休區薄之師惟帝王之兵所貴必全雖廝輿之卒靡容不備久留征討內切主臣援枹鼓則忘身死其所矣安社稷以爲悅人謂斯何夙夜以思進退維谷茲蓋皇帝陛下聖智同符於藝祖寬仁上協于光堯始以太王之心姑徇敵人之欲繼下元封之詔將躬武節之威猥遺見大夫同升之賢過取一個臣無他之技臣敢不力修戎律躬履顏行收尺寸之功敢事便文之舉固表裏之勢當懷經遠之圖

進東都紀年表

王炎

垂世規模莫盛本朝之列聖編年凡例宜如古史以成書削牘鋪張叩闥登進惟一祖八宗之繼序與三王四代以比隆載在縑緇藏于金匱其道榮華而不朽其文浩博而難窮自顧陋儒素慚鴻筆嘗塵清貫越在麟臺歷十載以究心具四時而繫事逮茲斑白

畢此汗青究而言之固多疏略識其大者亦頗著明恭惟陛下睿
哲自天憲章于古蒼姬而上遠則難行炎漢以來卑而無取闡皇
猷而善繼舍家法以何求察進退于羣才稽弛張于百度內綏黎
庶有省刑薄賦之仁外靜邊陲有習戰守疆之策討論故實採摭
舊聞庶便覽觀但提樞要所傳者信非徒殫精力于空言可舉而
行願以致隆平于當世

潼川路安撫到任表

魏了翁

王三錫命誤新渥于松階國十爲連忝舊封于梓部莫俞巽牘敢
後寅車伏念臣才不適時學惟事道際遇兩朝之久踐揚三紀之
間爲詩遺王名曰鳴鴉本期救亂取彼譖人投畀豺虎皇恤傷讒
尙憑高廟之神靈更賴天王之明聖返湘纍之初服釋楚繫之南
冠訖俾生還誓言死報矧又授鉞于赤甲白鹽之下予麾于玉堂
金壁之間猶未厭于宸心復游頌于閩寄地連巴益分四千石虎
竹之符江接牂渝理十六載龜琴之夢維時多故歷變方新民夷

有侏儒獲雜之難齊邦國有赤子龍蛇之未定而民力張弓之莫
弛邊氛煽燎之方揚豈惟鴉在梁之羞抑亦蚊負山之懼厥爲忝
冒實出會逢茲蓋恭遇皇帝陛下德歌九功明見萬里暢皇威于
海岱允矣東漸紆廟算于岷嶓瞻焉西顧謂南維之絕徼實北定
之良圖念及微忠復加隆委臣敢不修其可願欽乃有司銷帶牛
佩犢之風導之務本堅使馬如羊之誓廉以安邊

再辭免知潭州表

魏了翁

既明且哲以保其身非避害全身之謂陳力就列不能者止蓋識
時知止之難用干蕭斧之誅游貢需章之請伏念臣本無他技徒
有樸忠不由一介之先容誤被兩朝之厚遇雖遍陳于館學且游
玷于省臺然而始見愠于權臣開邊之時復取忤于貪相擅朝之
日分郡符者凡八握使節者以三精力竭于簿書期會之間齒髮
變于險阻艱難之際矧驅之五谿禦魅之役又重以七路董師之
行日邁月征心勤形瘵衰病見乎外瘍癰毒其中自今春卧病以

來非昔歲造朝之比嘗退量于愚分惟自託于叢祠不敢以人民社稷之司而求為疾痛癢疴之地豈期誤簡未諒忱辭升月殿之隆名授星沙之重鎮允稱異數夔出前聞且臣丙趨召而來至近畿而改命臣涇罷政以後即故里而起家或均佚以閔勞或棄瑕而錄善茲惟受任之重者豈意不求而得之況災沴之交侵乃滿盈之攸致伏望皇帝陛下檢會累陳之贖矜憐多病之軀念王事不敢告勞願趨勞而避逸人情莫不欲富獨辭富而居貧驗諸事理之相違決匪臣心之得己為亟願于閒廩俾歸伏于先廬凡未填溝壑之年皆圖報國家之日

謝周程三先生賜諡表

魏了翁

大儒輩出卓為正學之宗下使周諮敢舉尊名之典俞音才既善類知歸臣竊維聖道之晦明實兆世塗之理亂自犧黃發河圖之祕堯舜謹道心之傳粵商周受命之初凡誥誓羣言之首必論降衷之性必明為物之靈至若箕子陳九疇以敘民彝周公設六官

以為民極君陳以大猷變民厚君牙以五典示民中尹吉甫作秉彝之詩劉康公開受中之訓蓋興君令辟之所以教而羣公先正之相與言皇王以來不謀同符春秋而降幾絕如綫極於六藝之作與夫七篇之書孔欲無言孟豈好辨凡以扶天理而遏人欲傾時否而康世屯而權謀競興邪誠又作詞華代起科目相挺雖董仲舒嘗求仁於道誼功利之分而諸葛亮亦鞠躬於成敗利鈍之外洎韓愈之卓識喟孟軻之無傳然一傳而眾咻獨唱而寡和斯文不祿神氣有開挺生豪傑之同時尚友聖賢於異世自周頤圖書之既作而程顥弟兄之相承雖幽極鬼神實驗于躬行之近雖窮探性命不離乎日用之常未嘗躐等以好高大要近思而退省豈獨振千年之墜緒殆將開萬世之升平而從祀之請未俞節惠之文尚闕藐是庸虛之跡偶塵勸學之司籲天有聞躋地無措敢意奏篇之再遠蒙錫命之三速戒攸司各效美號茲蓋恭遇皇帝陛下通祇元命駿惠帝猷念大道之溼微賴諸儒之扶植雖美諡

既先於後學而褒章未被於前修莫標倡道之源宜謂彌文之曠
特章好以示俗不以人而廢言事光流聞時謂初見臣謹當誕敷
不訓敷俶羣倫明正道道民開示君師之意使先覺覺後維持天
地之心善人浸多斯世永賴

謝宣召入院表

真德秀

來從南服未宣民版之勞召寘北扉猥被宸綸之寵光生里巷榮
動簪紳竊觀列聖之用人惟待詞臣而加禮蓋于言語文章之外
責其論思獻納之忠或雖忤指而暫閒終必棄瑕而復用修除翰
苑在環滁出守之餘軾侍禁廷亦赤壁歸來之後豈非加歲月則
其文老涉憂患則其慮長乃登邃巖以備顧問如臣者才華弗競
慙拙自將掌先皇內制者六年每慙越俎迨陛下初元之再命竟
許循牆以驅馳州縣之頻且廢放山林之久見聞寢少藝業益荒
結茅屋于雲邊已甘終老瞻玉堂于天上若隔前生敢云白首之
重來誤辱清衷之妙簡獲玷久虛之選幾成三人之榮茲茲恭遇
皇帝陛下肆筆成文解弦更化志孚羣聽欲下山東之書念在邊
垂或訪河西之事必有端良之彥以充供奉之班奚取臣愚俾承
人乏臣敢不益堅晚節思荅隆知賜宮錦而嘉草詔之能雖非敢
望即金鏡而擯任賢之要則所自期

江東漕到任表

真德秀

兩螭夾侍久點近班四牡載馳叨分劇郡假中祕隆儒之寵為外
臺將指之光望過所期感深似惕伏念臣才非適用幸有逢辰屬
漢庭更化之初首唐室登瀛之選金鑾夜值承密命者六期玉陛
晨趨對清光于再稔凡吮墨揮毫之士皆振纓峩弁其間吏責既
稀所願優游于邇列主恩未報寧忘眷戀于本朝其于親聞喜懼
之年當謹人子清溫之職輒援公輔辭翰林之請庶幾潘岳奉板
輿之權分太守之符日需成命出少府之節遽冒殊恩懷章而過
里門闕宿而臨封部敬卜中和之節重宣寬大之書輶傳初馳旌
倪爭覩謂朝廷所以輟柱下之史蓋聖主將以惠江左之民因博

探于風謠頗究知其疾苦以垂罄之家而困追需之目以屢歎之
歲而多流徙之人官無定證之簿書里有難平之徭役文移星火
不勝胥吏之誅求牒訴邱山半為賦租之繁重興言及此勿救可
乎輒殫朝夕之諮諏兼體公私之緩急賦難遽省蓋漸捐賦外之
征民未易蘇當先去民間之蠹切自量其綿薄恐終負于選掄伏
惟陛下洪曲造成大明普照念臣志存將母俾獲便于旨甘知臣
學本愛人欲稍觀其政事肆加邃職仍畀重權臣敢不以阜俗為
阜財之方以悅民為悅親之奉灌輸所仰愧無鞭策之能搏節是
先敬佩玉音之訓

進大學衍義表

真德秀

汗竹雖厪何補聖經之奧食芹欲獻誤蒙天語之溫以十年纂集
之餘欣一旦遭逢之幸惟大學設八條之教為人君立萬世之程
首以格物致知示窮理乃正心之本推之齊家治國見修己為及
物之原曾子之傳獨得其宗程氏以來大明厥旨迨師儒之繼出

有章句之昭垂臣少有服膺晚而知趣謂淵源遠矣實東魯教人
之微言而綱目粲然乃南面臨民之要道曩叨侍從論思之列適
當奸諛蒙蔽之時念將開廣于聰明惟有發揮于經術使吾君之
心炳如白日於天下之理洞若秋毫雖其兇雜進於虞朝豈魑魅
能逃于禹鼎不量菲薄欲效編摩遠懼三至之讒徒結九重之戀
既投閒而置散因極意以研精畎畝不忘君每惓惓于報上藩牆
皆置筆幾矻矻以窮年首剏聖賢性命道德之言旁採古今治亂
安危之跡必提其要皆聚此書凡諸老先生之講明粗加該括於
君子小人之情狀尤極形容載瞻海嶽之崇深期效涓埃之裨補
茲蓋恭遇皇帝陛下乾旋坤轉日就月將於緝熙殫厥心基命適
隆于成后念終始典于學遜志克邁于商宗方將切磋琢磨而篤
于自修定靜安慮而進於能得事欲明於本末理期貫於精粗適
萃成編冒塵清燕止其所止願益加止善之功新以又新更推作
新民之化

辭免直微猷閣宮觀表

袁甫

爵祿厲世之權實國家之公器廉恥立身之節尤臣子之素心故上無濫予之嫌下安知足之分同歸一是庶獲兩全伏念某但有樸忠了無能解率意勇往每與世以相違忤物滋多由信己之太過豈譏評無因自至皆言行有以取輕痛門戶之凋零祈朝家之昭雪枕詞雖切從欲未頒正無地以措躬忽自天而錫寵既賦祠官之廩仍加閣職之華度義弗安捫心愈愧敢望特與敷奏曲賜矜憐冀成渙之亟收庶危蹤之善保多言誠為可畏從古而然止謗莫如自修由今以始

賀皇帝御福寧殿表

李劉

祕殿鼎新昭鴻名而日揭宸居離麗肅龍衛以天臨風來南面之薰星拱北辰之所恭惟陛下體元居正圖大宅中福庶民以是訓之彝寧萬國以惟和之政盡力致孝既卑夏禹之宮修政禳災復考宣王之室棟取於壯葺轉而豐鸞聲既便於觀旂鶴駕仍通於

問寢誕敷文德聿觀舞羽于兩階載績武功式燕躋堂之萬壽臣攝麾黔鄙馳夢清都四海為家更願綢繆於牖戶萬民安宅益堅壯麗之山河

淮西總謝到任表

李曾伯

乘傳東臺僅及轉江沱之漕升班左戶遽令峙天塹之糧請莫遂於再三職乃叨於其二感恩隆厚服命兢慚竊以江淮財賦之淵素推前代廟堂錢穀之問始自近年蓋由疆陲耗于搖蕩根本虧于腴削邊農廢業壽昌之斛糴弗行私鬻害公劉晏之鹽權亦壞楮幣輕而莫知措手米艘截而有類益吭炊沙未易以作糜捧卮詎堪于沃釜有洛陽處士將哀痛以深憂非江左名賢豈清談之可辨如臣者蹟寒寡援分薄多艱齷齪泥塗何有濟時之略驅馳塞漠未殫報主之忠自憂患之薰心幾功名之絕念迭更使轡猥玷郎關鼠河腹之已盈狐邱首而是望不圖恩綽驟畀賦輿惟前車之戒未遙而後爨之憂愈亟賡理深疾正扁鵲之寒心血指汗

顏將屠牛之貽笑龍光沃若畜負凜然茲蓋恭遇皇帝陛下綜核
臣工修明軍實豐財和眾聿新外治之規模立政用人宏建中興
之事業愛惜日力選拔時材知臣久在戎行險夷備歷謂臣曩承
父訓調度粗知遂俾庸流亦叨煩使臣敢不勤勞庀職精白承休
諾首山庚癸之糧願竭懦衷而經畫奏渥水寅申之冊敢祈淵聽
之矜容

庚寅宰執宣賜御製忠邪辯謝表

徐鹿卿

類別薰蕕正人心之趨向訓垂琬琰覩聖意之宣明回剝窮復反
之機導否極泰來之運雲章敷錫風化聿新竊聞忠邪本不相謀
是非斷無兩立知人則哲在帝堯猶以為難觀行聽言雖孔子未
之能信然疑似之多端易惑而虛靈之方寸莫欺果使清明之在
躬何憂黑白之易位欲其論定惟以事觀阿意苟容者必禹光犯
顏敢諫者卽王魏附佞文則寧復念國忤恭顯則決非為身弘也
詐而舒也純陸以忠而裴以佞至若和同周比之相悖泰驕義利

之不侔氣類各從肺肝如見惟文理密察足以有別如尺寸權衡
付之至公茲蓋伏遇皇帝陛下獨運陶鈞更調琴瑟青天白日灼
知三宅三俊之心履霜堅冰早知一陰一陽之辨懋緝熙於閒燕
取鑒戒於元龜聖謨昭黼黻之光才品惡紫朱之亂儼於有位精
以承休昔紹興旂戒石之碑諄諄厲節乾道製用人之論凜凜明
邪復見祖風六關世道臣敢不益嚴三畏堅守四維大哉言一哉
心若常近威顏之側有諸中形諸外毋少萌毫髮之欺

知建寧府謝到任表

趙汝騰

自天殊渥易地潛藩頃任以左馮不欲其遠去國今錫茲名壤特
寵之使便家曲為臣謀莫報上德謝中伏念臣迂無足採愚不可移
束髮讀書固已明義利之眇白首造闕何敢萌禍福之心況明主
可為忠言必更化乃克善治且職居于封駁遂力辨于忠邪詎謂
方當官而行已坐不得言而去積讒諛之擠陷賴仁聖之扶持諭
留行至再三趨領鎮凡數四繼上引嫌之牘旋叨改命之除惟外

大祖正獻臣俊卿與先大父吏部臣不敵皆於乾道出守建安藐
是孫枝續茲棠蔭力循牆而控免蒙頒詔已弗俞獎其有汲黯之
風論其以朱熹爲法適洪水懷襄之後豈臣子所敢固辭當諸賢
隱遁之時在屬籍不應堅卧勉爲吾君而一出既以上意而具宣
惟是牧羊者當爲之求芻集鴻雁者必使之安宅容臣區畫以
次條陳茲蓋伏遇皇帝陛下寤寐黎元宵旰治道謂臣赤心殉國
不自榮身察臣純意爲民頗知竭力閔此方之凋瘵付綿質以撫
摩臣敢不恭佩訓詞聿嚴條教心求之若保赤子斷不負聖經之
言天以斯而覺後知亦思振儒先之學

辭起復知州表

方岳

縑墨臨戎事非彝典詔泥假守情駭誤恩幸生孝治之朝敢干名
教之罪三綱所繫九頓以辭伏念臣本自諸生粗聞大訓金革之
事無辟其如禮何血氣之屬有知矧伊人矣久慨隙駒之過相傳
胡馬之驚時則師友責之以急難重以軍旅諉之於憂患力戰峴

山之北載驅淮浦之東蓋嘗揆之此心已不容于清議然猶諉曰
王事之孔棘亦奚忍于私親之獨懷匪以謀身庶其藉口今乃班
之匠簿付以州麾登堂而宣上德音孰爲教化下車而問民疾苦
自愧簡書豈惟不肖之孤見非有識之士言觀忠孝恐累聖朝伏
望皇帝篤敘彝倫誕修人紀矜臣報親之日短難勝風木之悲察
臣事國之時長未憾桑榆之晚母嫌反汗何吝轉圜變禮豈盛世
之常第深感歎終制者聖王之則別効奔馳

謝除刑部尚書表

代趙相公

方岳

祈父王之爪牙久負臨邊之寄尚書國之喉舌遽塵司憲之班懇
避無從叨踰已甚竊以班固志刑法兼存兵甲之繕修皋陶作士
師曰唯寇賊之姦宄蓋二者相爲表裏而四夷正賴鞭笞乃咨分
閩之臣與聞司臬之事繫此責則重矣非其人而謂何伏念臣受
國厚恩遭時多事當其南牧旣不能折遐衝以寢虜謀戒爾西征
復不能殲羣醜以敵王愾雖犬羊之宵遁尚狐兔之晝噪奚有微

勞肆茲懋渥蒸遇陛下以并包立皇極以懲勸興人心謂賞僭乃
淫固難私於八柄然功疑惟重顧何有於一官遂令孤外之蹤亦
玷文昌之選臣敢不視爲嘗膽獨有捐軀屈突通不習文已莫辭
於憲部馬伏波雖已老誓當死於邊城

謝郊祀慶成肆赦表

俞德鄰

饗帝于郊率百神而受職配天其澤混四海以爲家雨施雲行風
移俗易中謝臣聞祭而受福繇天意之棐忱赦匪惠姦欲人心之
遷善矧當嗣服之始具嚴報本之儀率見祖考休有烈光肆受諸
侯之覲亦右文母綏我眉壽更占厥後之昌將侈貺于三靈蓋馳
恩于九有舉令黔首盡洗丹書恭惟陛下齊聖廣淵嚴恭寅畏內
盡志外盡物可告神明車同軌書同文無有遠邇博厚高明之降
格輝胞翟闔之靡遺驛馬宵流金雞晨揭滌瑕盪穢想囹圄之遂
空敷偉鋪闕編詩書而無愧臣越居近甸親覩寬恩蕩蕩巍巍均
囿堯天之大穰穰簡簡益占周歷之綿

南宋文範卷二十八

南宋文範卷二十九目錄

牋 啟

謝皇太子頒賜誠齋二字牋

皇太子生日賀皇太后牋

賀李綱右丞啟

賀張丞相啟

轉官謝執政啟

賀史相啟

賀湯侍御啟 宋四六選

謝館職啟

賀張丞相除樞使都督啟

賀龔參政啟

賀周子中監丞年啟

謝司農簿啟

楊萬里

文天祥

汪藻

李彌遜

王洋

孫覲

任盡言

黃公度

楊萬里

楊萬里

楊萬里

韓元吉

賀禮部曾侍郎啟

陸游

賀何正言除左司諫啟

陸游

賀黃樞密啟

陸游

賀謝樞密啟

陸游

賀趙戶侍啟

播芳文粹

熊克

謝虞丞相啟

周孚

賀史發運啟

蔡戡

謝宰執啟

王炎

賀江西錢漕啟

彭龜年

謝張尚書啟

彭龜年

南宋文範卷二十九

長洲顧少卿先生鑒定

秀水莊仲方編

牋啟

謝皇太子頒賜誠齋二字牋

楊萬里

玉宇寶書賜一雙之白璧椽籬茅棟騰千丈之瑞光自媿野人恭

承嘉惠某中謝茲蓋伏遇皇太子殿下學關百聖天縱多能于兩

宮問寢之餘傳二聖揮毫之秘龍跳虎臥得精妙于太皇霧結雲

霏憲昭回于今上某敢不刻之琬琰垂厥子孫袖有驪珠函山川

之輝媚家無儋石藏星斗之文章

皇太子生日賀皇太后牋

文天祥

福于王母際南面之昌期天以神孫娛東朝之永日晝堂瑞節長

樂歡聲恭惟皇太后性蘊冲和仁培靜壽思齊所以聖也以御于

邦螽斯宜爾孫兮克開厥後皇皇穆穆繼繼承承臣迹滯騏原心

馳鳳闕本支百世播綿瓞之聲詩怡愉萬年衍含飴之福慶

賀李綱右丞啟

汪藻

伏審躬被策書進居丞弼精忠貫日正二儀傾側之中凜氣橫秋
揮萬騎談笑之頃國須賢立天為時生恭以某官厚德鎮浮英材
經遠得文武弛張之樞要獨運胸中明古今治亂之淵源不專紙
上爰自踐揚之始每勤獻納之忠老成尚有于典刑天下想聞其
風采昨屬殊鄰之擾上貽當宁之憂夕烽既徹于甘泉清蹕將遊
于汾水惟公夙夜與國存亡挺身六品之卑抗議九重之邃留家
誓死鑿血書詞銷大變于胚胎轉危機于呼吸洎干戈之指闕援
桴鼓以登陴義動三軍人皆奮死氣吞異類寇輒請盟身且九殞
以一生國則崇朝而再造昔李晟子儀之功高矣而未嘗定策張
良謝安之謀至矣而初不臨戎永惟元勳夔絕前古既名高而眾
媚乃讒就而身危士訟公冤亟舉幡而集闕下帝從民望令免冑
以見國人游經艱難益見奇偉方主上大明之今日實邦家希闊
之昌期欲眾賢同建于事功非雅望孰為之師表將萬世維持之

是賴何一時康濟之足言藻久託餘光欣聞盛事雖無緣進旅退
旅陪賓客之後塵豈不能大書特書續山林之野史巖廊多暇歲
律方春願精寢饋之調用副華夷之望

賀張丞相啟

李彌遜

伏審誕告大廷登崇碩輔爰舉非常之典用彰不世之勳夷夏聳
聞君臣胥慶竊以時不可失會聖賢之相逢事有至難快神人之
其憤蓋惟過物者必濟不待三年而有成收淮蔡之功始於能斷
卻淝水之眾孰謂矯情雖至今非得失所能重輕而天下以安危
繫於成敗一人注意萬口同辭藹然嘉績之多允矣懋功之報恭
惟某官明謨經世同德承乾獨高取日之能綽有回天之力心存
王室遠寵利而弗居志在中原蹈險阻而不顧馭將於掌握之上
致敵於樽俎之間借箸前籌嘆論兵之合我長纓係敵恨無官以
酬公載疏赤舄之榮益懋黃裳之業仲父之在江左朝野皆傾心
而來光武之下昆陽京師將傳首而至然養虎雖媚防其怒心逐

獸既窮慮其反噬深謀者不戰而備乘勢則以速為神欲必取於
萬全蓋兼收于多算某効功無路辱遇有年識君子之所為聽下
風而增氣屬紆郡紱阻曳賓裾瞻望門闌不勝欣抃依歸之至

王洋

王洋

居無限之員每慚月廩謝殊庭之成何有年勞拜命兢惶撫躬失
措竊以三載考績帝堯之典可稽六計察廉周官之書具在法成
令具見前世損益之文含垢匿瑕蓋前朝寬厚之政至或簿書期
會才不逮人夙夜靡常咎皆在我一投吏議必呈微文雖歲月之
屢移無勤勞之可錄西曹坐廢難逃百謫之誅隴首棲遲徒起十
年之歎名器已重得之實榮進退既分成者為首念某賦才譴瑣
臨事迂疎政無一矩而一規官乃三仕而三已矧中臺之部吏高
朝署之儀郎寓禁廷曾無兼直之榮逢大祀乃有及子之澤衡茅
動色里巷傳光夫何罪戾之餘有此僥倖之實某官平心恕物直
道經邦聖讒說以消壬人進善類以定國論咸其自取吾何為哉

待以無心彼自化耳春風扇物豈閒寒荻幽谷漸冰亦叨暖律某
敢不激昂士檢恪守官常洗五十九年之非誦千有一得之訓未
離溝壑期報德以敢忘痛念瑕疪誓洗心而未已

賀史相啟

孫覲

威鳳翔千仞觀中天日月之光神龍出九淵值開世風雲之會揆
路秉國成之重樞庭本兵柄之雄式資文武之全用注安危之意
路朝布號寰宇交歡竊以世有用至弱而為強深居簡出而養之
以勇事有冒大害而就利逆施倒行而權之以人陳平奉太后淪
高帝之盟盡王諸呂實欲安劉蕭何勸沛公固項籍之意趣駕漢
中志在蹶楚故有事犬馬皮幣玉帛雖太王之仁不免必欲驅蛇
龍虎豹犀象惟神禹之智為能恭惟僕射相公命世耆英受天大
任乘晉元帝南渡之後方倚謝安王導之賢迨唐明皇內禪之初
粵有宋璟姚崇之輔雖曰宰相非常之寵實分人主莫大之憂觀
兩國眾寡強弱之形考三朝理亂得失之故投干戈於地固危矣

出虎兕於柙孰禦焉當四方無事弗早圖之未然至一旦有急遂不知其所措仰惟帝王之佐挺然社稷之臣處變事而能知其權視國勢而先審所上不憚斯須之敬以定千齡卜世之長勿事尋常之爭以待兩河故疆之復某縻緯不恤杞天是憂堂陛之勢甚嚴而藿食之賤有同患吳越之壤雖異而同舟之濟無二心遂忘越俎之嫌願効食芹之獻

賀湯侍御啟

任盡言

伏審光奉明綸榮躋橫榻國朝更西都三府之制故御史不除大
夫端公居南司五院之中與獨坐迭為憲長自昔雖稱于雄劇比
歲或乖于選掄汚我霜臺賴公雪恥輒陳管見少助風聞靖言有
宋之奸臣無若亡秦之巨蠹十九載輔國而專政亘古無之二百
年列聖之貽謀掃地盡矣若乃糊名而較藝亦復肆志而任私敢
以五尺之童連冠兩科之士老牛舐犢愛子誰無野鳥為鸞欺君
實甚公攘名器報微時簞食之恩峻立刑誅錯當世縉紳之口一

時謫籍半坐流言父子至於相持道路無復偶語每除言路必預
經筵蓋緣乳臭之雛實與金華之講受其頤旨應若影從忠臣不
用而用臣不忠實事不聞而聞事不實逮政府樞庭之有闕必諫
官御史而後除所以復鷹犬之報而搏吠已憎疏鷓鷯之班而孤
危主勢私竊富貴之勢利豈止於子孫而為臣仰奪造化之鑪錘
至不容人主之除吏方當宁之意未罪魏其而在位之臣專阿王
氏致學官之獻佞假題目以文奸引前代興王之詩為其孫就試
之識旋從外幕擢至中都冀招致於妖言啟包藏之異意忠憤扼
腕智識寒心上愧漢臣既乏朱雲之請劍下慚唐室未聞林甫之
斲棺坐令存沒之奸備極寵榮之典正緣和議常贊睿謀故聖主
念功務曲全于體貌然憲臺議罪當明正于典刑賞當功所以示
朝廷之至恩罰當罪所以貽臣子之大戒政若偏廢國將若何敢
為上言莫如君重恭惟侍御氣剛而志烈學老而才雄自親擢于
中宸即大符於民望明目張膽士林日誦于讜言造膝沃心天下

咸受其陰賜雖直道盡更其覆轍而宏綱獨漏于吞舟惟九重之委任寢隆故四海之責望尤備願言彈擊無置渠魁矧今日之新除有昔人之故事韋仁約自稱鵬鶚才固絕倫張文紀不問狐狸惡惟誅首縱黃壤之已隔在白簡以難逃使六合之間忠義之心如日九泉之下邪佞之骨常寒庶幾紹興湯御史之名不在慶厯唐子方之下其他世俗之詔語諒非方正所樂聞側聽褒遷別當修致

謝館職啟

黃公度

稅鞅南州初離冗調讎書東觀誤玷清流辭恐近名受慚非據竊惟治道之隆替常繫人才之盛衰苟養於閒暇之時而須其成則至于緩急之際而收其用故皇朝大開儒館列承明著作之庭遴選時髦典圖籍藝文之事一無吏責每號英遊非獨究簡編之斷殘抑將待器業之成就或以淹該而持從橐或以詞藻而代王言或經術淵源而師表諸生或識度宏遠而參陪大政凡旋登于要

路率多由于此途矧夫睿聖中興典章大備追述祖宗養賢之制式符堯舜稽古之心珍館一新掩天祿石渠之壯麗遺書盡獲軼開元正觀之盛多自非博物洽聞欲才偉議苦心識子雲之奇字強記誦安世之亡書則何以接蓬萊方丈之遊紬金匱石室之秘如某者趨時獨拙賦分最奇鈍遲無倚馬之才涉獵之夢熊之對少壯努力初欲無愧于古人長大苦饑豈敢有意乎當世徒以家聲之墜地要須儒術以謀身不圖叢爾之才乃中褻然之舉一行作吏百不如人自決科雖閱於八年而蒞事纔更於二考汲汲于斗升之祿區區為口腹之謀忽被優遷實踰素望人皆歆艷曰登瀛之榮已獨凌兢心懷臨谷之懼重念寒門之先世蓋嘗斯迹于英躋坐復青氈慚無欲向父子之學自量素業難居傅班伯仲之閒何取孤蹤亦陪俊軌茲蓋伏遇某官股肱元聖羽翼斯文雖巍巍勳業之無前尚切切人物之為意提攜晚進不遺下體之菲葑收拾寸長盡種盈門之桃李遂令頑陋亦預甄陶某敢不奮發

遠圖溫尋舊習力死而後已之學讀生而未見之書誓竭微軀仰酬洪造雖大臣務得人而報國不容謝私然志士爲知己而殺身豈敢忘德

賀張丞相除樞使都督啟

楊萬里

恭審疇咨元老首冠鴻樞自祖宗欲再相于舊臣先施此典宜神聖又一新于督府爰舉徽章國重以人德浮于位恭惟某官道侔三代之佐學關百世之師卽之溫然乃名滿寰區而不處識其小者爲才兼文武之有餘國論萬變而守如初孤忠百鍊而難于合胡馬南牧折箠以斃其酋袞衣東征投戈而拜吾父與其淹恤于邊圉曷若遄歸于廟堂蓋欲傾海以洗乾坤公之始願則不以賊而遺君父誓不俱生上勉徇于精誠禮始崇于宥密關河響動華夏氣舒萬口驩呼孰不誦諸葛出師之表諸生延佇又將賡武公入相之詩某吏畢言還郵傳聿至語心獨喜尙見太平于桑陰未徙之間引頸非遙行望餘光于槐蔭已成之下其爲頌詠罔旣敷

宣

賀龔參政啟

楊萬里

疇咨正人參秉大政惟天祐于有宋將開平治之期惟后非得我公不在弼諧之選罔謂一賢之寡已底萬邦之孚恭惟某官表粹而裏剛人今而道古所立卓爾皆詩書未作之傳舉而措之非秦漢已還之業頃在諫省人謂冰霜及臨帥蕃民稱父母觀者異視吾惟一初然抗疏宸居排羣小于不用之處而救荒江介活百城于旣死之時雖云緒餘獨不雋偉人望欲逃而莫可上心旣用而乃驪將階兩地之嚴遂冠三能之極抑天下無難療之病惟藥者有宜老之方儻苦口之貯儲則元氣之充實此執事平生之所挾豈今日得時而不爲某舊供走趨雅辱知遇歸歟空谷方鋤三徑之荒仰止慶霄忽覺五雲之遠

賀周子中監丞年啟

楊萬里

三日立春方過寒氣土牛之送二年正月又見盍簪櫪馬之喧有

美一人來同萬福伏惟某官人物標的文章主盟翦水鏤冰瑀天
葩而競巧御風騎氣與造物以同遊哀對履端之告元乘成泰吉
而彙進雲隨白水聊小咏于鶯花日射黃金即高吟于煙草某老
兼疾至坐感時遷江露野梅敬寄一枝之信椒盤柏酒阻稱千歲
之觴

謝司農簿啟

韓元吉

百里之才曷勝選用一介之賤誤入招徠俾廁王官殆踰已望竊
以人之所慕者富貴蓋富貴有時而不可求士之所志者功名故
功名無往而不可立然狃于富貴則見利不知有義急于功名則
遇事或至失身此聖賢以為行藏之機而古今以為治亂之要在
我而已其誰念之惟國家取士既小異于漢唐朝廷用人抑又拘
于格法雖紀綱大治承平過于百年而風俗寢偷禍患生于一日
重以權臣之荆棘了無國士之弓旌恩必已歸爵惟私市幸聖人
之更化仰明哲之佐朝苟一善之薦聞皆趨召而賜對布在列位

使無遺才自非猖狂疾病之流孰不奔走謁蹶而至不特引君子
道又將觀國之光夫何慧愚亦在齒錄伏念某少知學問長迫飢
寒一經之傳既不足以自奮五斗之養特未免于為貧竊嘗妄意
于古人故亦希蹤于諸彥三從吏選僅為祖述之先五試詞場迄
拜孟明之賜揭繇縣宰始見公車詢事考言曾乏過人之慮料敵
制勝妄陳決策之謀方懼觸于嚴誅乃遽叨于美仕宦于九扈職
預百司祇懷受粟之差詎識獻芹之陋此蓋伏遇某官道存經世
業懋享天藻鑑士流欲賢愚之並用權衡帝載思邪正之彙分舊
蒙一盼之私曲示兼容之度致茲幼賤猥荷甄收某敢不力探師
友之源淵恪守高曾之規矩惟農夫之有畔豈敢越思若射者之
反求粗知正己庶靡墮于職業以無忘于恩憐過此以還未知攸
措

賀禮部曾侍郎啟

陸游

恭審顯奉制書進司邦禮所養既厚萬鍾亦何足言眾望所歸九

遷猶以爲緩惟是老成之用式昭致治之符凡有識知誰不驩喜
竊考六官之制本皆三代之餘惟宗伯之清華極近臣之遴選誠
使此地常得其人則朝廷日尊自弭未形之患論議守正亦折羣
邪之萌一昨多難寢忘大體刑名錢穀獨號劇曹文物典常僅同
虛器蓋道由時而升降官以人而重輕苟凡材非據於其間則舊
章何恃而不廢孰謂斯文之幸復聞公議之伸恭惟某官直哉惟
清淵乎似道心至虛而善應名弗求而愈高紬繹六經推明上世
之絕學度越兩漢追配先秦之古文早並遊于洛中晚獨步于江
左人誦其德家有其書使少貶于諸公已亟升于華貫顧久幽而
彌厲凜自信之不回上屢興見晚之嗟公猶懷勇退之志勉收功
業于無復意之後起踐富貴于不得已之餘黃髮皤然德容穆若
昔者慶厯之盛側席而致眾賢元祐之初加璧而聘諸老今茲盛
事可謂無慚然猶漸進于省中未足大慰于天下竊謂德齒之貴
宜登師保之崇入則几杖三雍之閒出則卷繡百工之上使勳貴

歛衽畏楊縮之清朝野洗心化毛玠之儉紀話言于竹帛肖形象
于丹青垂之無窮然後爲稱某頃陶善誘嘗辱異知雖借勢于王
公大人非迂愚之敢及惟侍坐于先生長者尙夢寐之不忘逃聞
綸綍之傳獨阻門闌之慶仰懷曩遇不勝下情

賀何正言除左司諫啟

陸游

恭聞親詔登用大賢以白首魁偉之臣膺明時諫諍之任善類相
慶公道遂行竊以逆旨犯顏人疑于甚難而君子謂之易盛朝治
世眾安于無事而識者以爲憂然非身居獻替之官與夫素著中
外之望雖抱此識何自而言邈乎太平之難逢考之前史而可見
以正人遺聖主實惟祖宗敷佑之心而公議在朝廷豈非廟社無
疆之福恭惟某官心潛百聖學貫羣經老臣之風師表一世直養
之氣充塞兩儀立朝寬大而持平論事雍容而守正虛舟觸物此
自信其無心怒髮衝冠彼安知夫有體居多聖政之助始明儒者
之功非獨誠僞不可以欺要之忠邪久而自判上眷旣厚人望久

歸遂當登四輔之聯豈久置七人之列某頃以樸學嘗預諸生雖在泥塗猶是門闌之舊物竟無名第亦竊場屋之虛聲敢俟明公勳業之成勉繼與人歌頌之祝不足為報姑盡此心

賀黃樞密啟

陸游

恭審顯膺制書進貳樞府威望之重宗社所憑天其相有求之圖日以冀中興之治竊以朝廷之政屬在帷幄之臣方無事之時雍容坐談則夫人而皆可應一旦之變酬酢曲當非有道者不能歷觀昔人蓋鮮全美王導之襟量而學不至德裕之術略而器未優故晉卒安于江東唐莫追于正觀有志之士太息于斯恭惟某官心正意誠任重道遠躬卓行于苟且自恕之俗推絕學于散闕不全之經凜然一家之言發乎千載之闕加之博極墳史得興亡治亂之由綜練典章識沿革始終之際氣足以攝姦慝明足以察忽微其在掖垣惟公議是達其侍經幄惟王道是陳果由師錫之同入總本兵之紀然而方時多故為計實難夷狄鴟張肆猖狂不遜

之語邊障狼顧懷震擾弗寧之心東有淮江之衝西有楚蜀之塞降附踵至人心雖歸而強弱尚殊踊躍請行士氣雖揚而勝負未決堅壁保境則曷慰後來之望闢國復土則又有兵連之虞竊惟明公素已處此某頃聯官屬獲侍燕居每妄發其慙愚輒誤蒙於許可雖輟食竊憂於謀夏而荷戈莫効于防秋敢誓糜捐以待驅策

賀謝樞密啟

陸游

恭審顯膺出綽進貳本兵蠻夷奪氣而息謀朝野動容而相慶恭惟某官英猷經遠敏識造微秉心如金石之堅論事若權衡之審主知千載際聖世之風雲言責三年極人才之涇渭士恃公平而不恐上嘉孤直之無朋遂由常伯之聯進貳中樞之任較一時之同進得喪孰多付四海之僉言忠邪自見固將力回薄俗盡見明謨網漏吞舟示太平之寬大雲興膚寸澤庶物之焦枯豈惟康濟於茲時固足儀刑于後世某早迂記省晚荷甄收雖知薄命之多

奇猶復誦言而不置使駑馬妄思於十駕而沈舟未羨于千帆求之古人可謂曠世難逢之會報以國士敢忘終身自勵之心

賀趙戶侍啟

熊克

伏審輟從天邑擢佐地官上簡帝心無越宗英之望下蘇民力有嚴邦計之權是增屬籍之光豈特禁途之盛竊以洪範八政食貨是先水衡九官錢幣爲急自古資爲經費於今職在版曹雖崇儉去奢本躬行於聖主而量入爲出藉心計于良臣恭惟某官問學精微行能高妙挺出神明之胄蔚爲邦國之華周族振振望固推於標的商邑翼翼化旣浹于本原遂分職于大農爰進班于亞旅孟軻將有利國必陳仁義之言冉求可使足民不忘禮樂之事某猥分偏壘阻拜崇墉錢穀之問不至於廟堂暫煩獻納宰相之賢有出於宗室佇任弼諧

謝虞丞相啟

周孚

擢從冗散之職昇以師儒之官眾爲嗟驚自慙微幸伏念某受才

骯髒百無一堪觸事屯邅十幾九躓昨叨一命之寵已踰五年之期唯窮邊之劇繁不容尸祿而文吏之齷齪或至辭難屬新制之舉行自故官而汰去方其襤被之際幾有向隅之悲雖窮當益堅自甘踽踽之誚然老其將至不勝皇皇之心豈謂高明見錄微小賦以斗升之祿俾與簪裳之遊罔使盛時復有綿蠻之歎更憐薄技得盡侏儒之能況某少多病而今益衰壯嗜學而晚彌甚常憂尉曹之責恐非書生之宜精神疲于徼巡術業荒于奔走惟今所授實自本心俸入厚而足以活妻孥符檄亡而可以閱文字率爾而得恍然以驚茲蓋伏遇某官大以有容明而無蔽才之鉅細各收其用人之邪正洞察于中謂朽株猶足爲薪而老馬尙能識道故推大惠以及小夫仰懷濡手之勞愧無以報惟有銘心之感誓不敢忘

賀史發運啟

蔡戡

擢司邦計就畀使名以三十年之通坐制經常之費雖數千里之

遠盡持飛輓之權竊以周建六卿首命司徒之職唐置諸使或兼宰相之官惟食貨之重自古如茲而兵民所須于今尤急又況主大農之調度總諸道之轉輸必有非常之人乃副久虛之選如蕭何諸葛亮獨高轉漕之功若劉晏第五琦深究理財之術蓋得心計之妙故知利源之歸人不加賦而國用饒民有餘力而頌聲作幸追前哲允屬真材恭惟某官四海儒宗一時人傑縱橫應變了事理于胸中慷慨論兵運經綸于掌上親承睿眷徧歷亨塗握蘭獨望于郎曹持橐寢儀于禁路守別都之筭鑰擁制闔之旌麾表裏江淮允藉籌邊之略牢籠山澤素韜富國之謀上方茂建于宏規公乃進膺于大任自非蠲制而改令何以阜財而裕民深惟眾弊之源亦非一日之積其本自朝廷之上其流及郡縣之間兵籍久刊况吹竽之濫進吏員寢廣幾毀瓦以空餐度緇黃而利少害多崇工商而本輕末重生者寡而食者眾取之盡而用之煩剝肉補瘡每憂于不給剝膚槌髓或出于无名不聞上下之相通安得

軍民之兼足甚者楮幣流行于中國銅錢轉徙于他方片紙而直千金故不難于偽造一物而立二價宜必致于交爭農末均傷公私兩病蓋本權宜之制豈為經久之圖不有更張坐見困敝莫重計臣之任正需王佐之才方將日運千艘給餽餉不絕糧道風行萬里奉教令如在目前必權母權子而制得其宜可足食足兵而事無不濟既盡行于儒術斯大慰于民心豈特貫朽粟陳頓還文景之治將見家給人足當如成康之時時收萬世之功必正三公之位某效官屬部隸迹使封披雲霧而見青天方幸揚舫之屆如燕雀之賀大厦敢忘秉牘之誠

謝宰執啟

王炎

義釋義經徹冕旒之乙覽恩疏漢詔獎鉛槧之辛勤仰瞻咫尺之天光垂照尋常之穴見喜雖榮于寵錫懼莫稱于褒嘉竊以道載六經易關三聖理存于畫文王重以生爻意見乎言尼父述而為傳顯足以措諸事業妙至於行乎鬼神奈何後人以爲卜筮之書

蘇此學者莫探乾坤之蘊田何所受流于京孟之誣王弼未知雜以老莊之說自開戶牖輕棄筌蹄論互體者略而未詳辨繫辭者信之不篤泛考前言之異精求至當之歸四象具則八卦之體存十翼明則二篇之義著仰望虎文之變聖則生知俯慙馬智之專學非自得妄謂食芹之可獻敢期采菲之無遺給簡示優遂成細帙奏篇稱善驟錫璽書燭火至微何益日華之明潤璿霄雖遠獨瞻奎畫之光芒不有先容曷膺殊渥恭惟某官爲時先覺得道正傳贊乾坤之元幹機衡于國乘白賁之飾煥經緯于人視盛世之崇儒推公心而與善願此編摹之久矜其探索之勞未窮文字之深微亦被玉音之獎力炎要當守其所學毋徒托之空言細札十行爲終身之焜耀陳編三絕愈篤志以沈潛

賀江西錢漕啟

彭龜年

明廷疏寵延閣陞班賞當其功人爲之喜某竊謂君子不以非分之受爲義吾人貴乎不妄以予爲公惟受之以義故不敢忘皮冠

之招惟予之以公故不敢徇繁縷之請方聖天子申薦賞之令而部使者策將漕之勳名視實而不浮位因人而愈重恭惟某官以有用之學發名世之材入侍禁廬已罄論思獻納之益出總外計洞知本末源流之歸今天下之利盡取以無餘而大農之官猶以爲不足當國家閒暇而若此則軍旅調發且奈何屬前日羣竊之緩誅徵諸道勁兵而皆聚孰出木牛之智少紆汗馬之勞佐軍而常操贏資卒藉劉士安之術給餉而不絕糧道莫償蕭相國之功果聞異數之亟來徑陟清資而益峻以盜賊所傷殘之地值朝廷加寬大之恩蠲租賦以與民招流亡而復業固明君屬望之深者必大賢加意以圖之某敬爲斯民慶此實惠盡宣德意既無遠之不通嗣聽褒嘉將繼茲而又賀

謝張尚書啟

彭龜年

微官脫選今以爲難小已逢辰人知獨異施厚者未易語報感深者不容以言試具陳之則可睹已伏念某身勤而事左意廣而才

疏每讀書必欲求志士仁人之心自爲士已不屈王公大人之下
顧如愚戇褊急之累在性質可謂之偏而其琢磨澄治之功于師
友未有所得而接物動輒忤人終雖察其無他始未免于不樂
平生知己焉得如公四海閱人抑安取此才非敏健而以爲可任
智多昏塞而引之與謀言雖妄而亦容事可行則立決在他人一
語之不偶故宦遊半世而無聞忽遭清明如脫羈束凡胸中之所
欲可悉達矣雖天下之達官殆不過焉况復蒙汲引之公無不盡
推挽之力必欲亟援于塵土不知難近于雲霄已獨任于揄揚人
備聞其委曲勇于拔士誰復如今恭惟某官以魏國忠孝之傳負
本朝公輔之望每闕于郡國之小未究素懷所至以人物爲先此
其大略有如猥質尤費生成竟出選曹豈非僥倖某敢不益懋舊
學以酬所知舉者未嘗進謝于門情雖不稱大夫真能取人以義
報豈容私強爲尺咫之書莫殫萬一之意

南宋文範卷二十九

南宋文範卷三十目錄

啟

謝潘安撫列薦啟

賀唐守啟

謝越帥王尙書希呂關陞狀

謝留丞相啟

賀鄒給事啟

代外舅謝丞相轉官啟

江東賑濟無罪可待謝丞相啟

通鄭侍郎啟

賀真舍人啟

上魏左史了翁啟

賀黃制置賜金帶啟

賀劉察院啟

陳傅良

陳傅良

孫應時

陳亮

程秘

真德秀

真德秀

吳泳

陳元普

陳元普

李劉

劉克莊

賀傅侍郎挂冠啟

劉克莊

謝鄭給事應詔薦賢能才識啟

王邁

通沿江別制帥啟

徐元杰

賀蔣諫議啟

方岳

謝江樞密萬里啟

文天祥

賀江左相啟

文天祥

賀趙侍郎啟

文天祥

賀宗臣元正啟

謝枋得

賀步帥除節度使總統軍馬啟

俞德鄰

南宋文範卷三十

長洲顧少卿先生鑒定

秀水莊仲方編

啟

謝潘安撫列薦啟

陳傅良

舉最有三罔功第一雖未嘗于推擇終日切于依歸伏以蕞爾桂陽已非古郡析郴置縣與廣為鄰周職方之所未聞漢刺史之所不察蓋厥壤處諸華之裔而其君視大國之孤嘗因壁記以泛觀自升軍額而枚數中興至此凡六十載之間善狀為誰纔一二人而已閒或收效于毫髮曷嘗挂名于齒牙未有當路為之同辭刻章至于專達越在他邦之上突如今日之榮豈無賢榮堪此寵異昔方岳考績于僉言以見公春秋予人至特書以為貴倘凡流而與此將公論之云何如某者才不逮中學非適用早嘗困于鉛槧晚但謀于稻粱豈謂誤恩遽叨假守意所勇敢動遠小吏之規理當便宜輒束拘儒之見徒勤無補將罪是求矧惟郡計之空重以

歲功之薄欲罔民而何敢懷言上以無由惟有再三以乞憐庶幾
萬一於免戾居常自謂殆非巧宦之宜爲已乃不然竟以拙誠而
見錄某官當今先進薄海達尊覆護諸生不遺餘力扶持斯道如
是隱憂每于眾好惡之言獨有公是非之意始以致曲將如萬折
之必東迨其既孚則併一談而弗破遂令庸陋亦被甄明某敢不
更體深知益堅晚操處非其據幸而轉敗以爲功歸潔其身當務
以退而爲進

賀唐守啟

陳傅良

九天雨露渙黃麻紫誥之寵恩千里雲煙藹綠水紅蓮之佳氣室
家胥慶福祿日來寸心方樂于鶯遷尺牘宜申于燕賀恭惟某官
陶唐析派岷蜀儲行學海波濤浩錦江之萬頃詞林根柢屹劍閣
之千峯望鵬路以橫飛指鳳池而峻陟主知固結宸惠至濃忽辭
青瑣丹墀聊擁朱轡阜益判花甌上振相如揚子之芳塵夢草堂
前躡逸少謝公之邁軌精神秋月談笑春風蜚紫馬之英聲掃蒼

鷹之苛政家給而衣羸五袴年豐而麥秀兩岐未爲商室之霖已
沛潁川之雨禮晞東閣屢開北海之樽性戒西門止用南陽之杖
下車屬耳載路驩謠優爲列城二千石之良先達當宁十二旒之
聽宜蒙天渥尤慰民瞻一札細書拜白水真人之賜千金增秩繼
黃龍循吏之名與星斗以增輝覺湖山之動色祇恐縉紳之交薦
不容州縣之徒勞朝廷已深知弱翁信將大用天子久不見賈誼
想亦深思某寄身鑪錘之間託跡幘幘之下喜而不寐樂且有儀
已幸營邱成五月報周之政更期河內申一年借寇之言

謝越帥王尚書希呂關陞狀

孫應時

遐陬試吏仰末照以自安會府薦賢潤餘波而下及退省泥塗之
陋顧塵風裁之高非分所蒙雖榮而懼竊念某天資底滯人事闊
疏守父兄之樸學而錮其愚習師友之緒言而膠於用擁書自嘆
徒妄意于古人拊已自知亦何取於斯世悵田廬之無有曾菽水
之不謀猥以諸生進于禮部上汗衡鑿謬齒簪紳復久逃於空虛

亦竟忘於贊謝低徊巡徼怵迫簡書草澤漁樵作封邱之清夢江湖歲月媿彭澤之高蹤粵閩帥轂之東雖喜師門之舊雲天勢遠榮戟難依燕雀情卑緘膝莫訴託幘幪之甚大實筆楚其已多云何駑散之流忽昇鶚書之重所施過甚自視恍然茲蓋伏遇某官宗社名臣乾坤閒氣垂紳入侍朝廷增九鼎之安授鉞開藩京師蒙千里之潤紀綱一面襟帶列城居天下之望而寬以待人位方伯之尊而急于下士明足以周庶物之情偽大足以器羣生之短長雖是瑣微盡從甄別原選舉之初意慨風流之久衰權門爲之摩肩市道幾于攘臂芴芴至此耿耿何言敢圖後生復見前輩冷金不躍寒谷自春洋洋乎愛樂人物之心表表焉扶持善類之力慙所取之非稱尙有傷於至公敢不砥礪前修激昂壯節流行坎止聽造物之何如松堅玉剛庶酬知于未老

謝留丞相啟

陳亮

數十年窮居畎畝未諧豹變之懷五千言上徹冕旒誤中龍門之

選顧今自喜論古良慚雖欲有言莫知所謝敬惟大丞相少保國公卓犖良臣勤勞碩輔重道崇儒之正學素所講明立綱陳紀之大經備嘗議論秉鈞獨當大任持衡務適厥中爲社稷之元龜掌文章之司命獻謨猷于左右固光裕於後先如亮者才不逮於中人學未臻于上達十年壁水一几明牕六達帝廷上恢復中原之策兩譏宰相無輔佐上聖之能荷壽皇之兼容恢漢光之大度留張齊賢以遺主上俾宋廣平而冠羣儒靜言叨冒之多知自吹噓之力亮青年立志白首奮身敢不益勵初心期在重溫舊業出片言而悟明主尙愧古人設三表以繫單于請從今日若徐求其可稱必更得於所圖

賀鄒給事啟

程秘

幕府策勳宸廷進律赤丸夜語習聞猗猗之鳴白羽徐揮聊正鯨鯢之僂竊以安民孰急去盜爲先蓋稂莠不除嘉禾曷茂虎狼旣盡羣生乃蕃故虞書明奸宄之刑魯誓申寇攘之法非徒嫉惡亦

以移風然吏道以簿書期會為常莫知應變儒者以章句文字為學孰能知兵自非經世之全才寧有驚人之偉績某官氣姿卓犖智略雄明由言語侍從之臣為禮樂詩書之帥熊旂豹尾仁風已扇于列城龍戶馬人美化更孚於絕域然疆理控滄溟之險而風波多姦盜之虞自昔以然不時而動萑蒲叫嘯輒曹伍以成羣水陸跳梁常出沒而為害小施英略悉殄羣兇長劍利而水剽蛟龍暴鱷除而陸全犬豕騰歡謠于萬里下褒璽于九天某素辱眷知尤深贊喜馳慶方修于頌語鳴謙首賁于珍函開南嶽之雲煙暫敷德意卷中原之氛祲政藉威名頌詠惟勤敷宣罔既

代外舅謝丞相轉官啟

真德秀

上印歸田已就休官之列賞功試邑遽陞元士之班不自意于退閑尚微榮于採錄恩惟天造感極涕零某忝紹熙太學之諸生溷慶元奉常之一第自徒勞於州縣顧何有於智能妄學絃歌丁時凋瘵以官民之交病將革弊端若穀祿之不平孰為仁政新版籍

于片紙不存之後復經界于歷年久廢之餘精神方耗于一身怨謗已騰于眾口逮小綴觚棱之蹟而洵分江海之麾除目雖頻駭機俱發青油談笑暫容覓句于杜陵烏府紀綱又俾挂冠于神武歸逃空谷細數流年朝拄笏以看山暮脫巾而漉酒款乃和漁翁之唱屢屢聽桑婦之歌得與幸民共陶聖化俄墜濕鴉之字下流羅雀之庭謂二九年前首效均賦度田之役於十一人後可無賜袞增秩之恩遂令還里之餘亦拜衍租之寵邱山施重淵谷懼深恭惟某官躬不世出之資佐大有為之治杜羣枉開眾正將馴致于太平恢長治建久安已坐銷于外侮惟公則無所不取惟大則自能有容必能起斥逐以風四方詎肯守拘攣而廢一士某宦情已薄爵齒未盈託鏡頻看敢仍有功名之志據鞍自請幸庶幾矍鑠之翁或可以使過而使愚亦粗能效忠而效死收桑榆于短景倘容吹晚節之薌出芝菌於枯株重有賴大鈞之賜

江東賑濟無罪可待謝丞相啟

真德秀

巧語上聞方抗章而自列隆恩下逮况赦過以不誅奉詔凌兢拊躬感惕某本慙通敏徒抱闊疏入侍軒墀每見玉色憂民之切出乘使傳復觀璽書恤下之頻誓竭駑才祇成德意屬江左並罹于早暵而桐川猶慘于凋殘蒙賑贍之特優懼奉行之弗稱夙宵一念民飢奚啻於已飢經畫百爲王事殆同於家事所冀推仁恩而均被靡遑顧文法以自營頃當原隰驅馳之時備觀田野焦熬之實欲糶則人苦青蚨之乏欲濟則官無紅粟之儲抑立視其死與既有負求芻之託苟利專之可也又難逃矯制之刑與其失職而偷安寧若捐身而任責勉效便宜之舉亟奉開可之音顧小臣敢越于拘攣見盛世素行于寬大是乃彰朝廷之美何致干堂陛之嚴以王命而賙民艱本其所職貪天功以爲己力焉有此心豈虞止棘之讒乃出剖符之守情狀深藏而叵測有媿生知語言妄發以不倫本無足辯荷天日照臨之赫免風波淪陷之危茲蓋伏遇某官以至公而秉化鈞以深仁而培邦本謂羣臣之善亦王之善

齊人尚有格言而眾職之功乃相之功柳子誠爲確論凡悉力以裨荒政乃盡忠以報公朝肯令譖愬之得行馴致是非之易位特加全護俾追譴訶某敢不仰佩洪私益堅素守

通鄭侍郎啟

吳泳

瞻五色之雲知有鄭公之人瑞問三奇之戍恍驚葛亮之天威自單車徑度于玉關而尺紙未登于籤府每懷靡及輒誦所聞靖惟南紀之上遊無若西徐之重寄殘金雖斃尙時肆于逼牆靈夏方張亦嘗聞于乞狀行險者妄欲投夫可爲之會偷安者則又付之無事之鄉連雞固不能以俱棲困獸亦豈容于無備藩籬未固外莫禦于風寒根本先顛裏難禁于汗下鷹脫鞴則揚去雁聞弋則悲鳴旣無誠死君上之心卒狃盜弄父兵之態雖陵夷之有漸亦撫御之失宜漢師忘夙飽之歌楚士起多寒之歎至問積倉之數殆如窶室之空登首山呼癸庚梁則無矣循秦嶺當子午憂又甚焉况兼節根之螟爲我赧尾之蠹食苗食心食葉分毫何利于公

家剝足剝辨剝膚八九盡歸于私室顧方眾難塞胃之後當有良
醫洗髓之方然而文俗拘攣人情熟爛加以事權之錯出因之體
統之弗明士臣阜阜臣輿本相隸屬身使臂臂使指焉可支離紛
紛輿瓢之人落落背劍之議職分不專則國威褻號令不一則人
心疑節制敗于多門陸相所以論沿邊之狀王師眾而無統令公
至于喪諸道之軍凡精神之弗強由脈絡之受病惟開公誠可以
綜萬事惟布威令可以收人心惟章明國法而後黜陟自由惟改
紀軍政而後伸縮如意率顛和于眾感毋胥動于浮言則不惟保
吾蜀以偏安雖以是取中原而亦可恭惟某官堪輿開氣湖海偉
人風範端凝如清廟邃嚴而莫窺寶藏文章浩博如黃河流轉而
突起層瀾雖嘗編摩宥密之閒然喜開濟功名之會月清溢浦頗
嘔溫嶠之燃犀風靜維揚坐卻佛狸之飲馬肆疇庸于玉帳還召
對于金門陸之甘泉法從之班渙以堯閣雲章之直徑從碧落來
上青天導國家之德意志慮而致之民陟山川之險阻艱難而撫

其實磔鼠輩于市不言征西破賊之功去狼貪于民盡還蔡人有
生之樂少清紫邏卽近黃扉某粗繙戍夜之書叨竊辰年之第侶
青衿于泮水諸公時取其袞然攜綠綺于萬山舊識或爲之莞爾
尙幸以一雷之地得託諸半壁之天鵬鷗分殊安敢援金花之舊
事象犀筆在尙能摩崖石之斷碑忻怍惟新敷荼莫喻

賀真舍人啟

德秀

陳元普

恭審課最州麾命分帥鉞四郊多壘根本繫大江之西十國爲連
蕃屏倚真儒之重高牙戾止交口欣然矧平生翹首于龍門不自
意庇身於燕厦其爲獨喜尤倍羣瞻恭惟某官氣塞兩閒名高九
牧立朝大節益已羞英俊之並遊學道夙心誠以安社稷而爲悅
曩敵情之叵測紛肉食之偷安誰念春秋大一統之經獨主漢賊
不兩立之義好辯者豈予得已不知者謂我何求遠猷竟格于羣
言遺患乃至于今日汲黯不去必寢淮南之謀吐蕃旣來始驗柳
渾之識薦外庸之揚歷多行事之著明青社活人愛民卽所以體

國潢池平盜應變寧滅于守文合入贊于帷籌尚屈臨于闔制十
州將吏聽鼓角以趨風千里湖山望旌麾而吐氣然當世之憂未
艾而吾黨之望焉依代不數人是應任天下之重天若祐宋寧不
速我公之歸某副墨寒儒句朱宥役生無他嗜惟有強附善類之
心事與願違獨抱未見君子之嘆悵一官之似縛思萬物以皆塵
幸元戎十乘之來與屬吏一人之數顧受容之伊始非修敬之敢
稽亦領大府約束之新不責小夫竿牘之末急求民隱皆許言陳
因欲殫千慮之愚故少緩尺箋之敬假一事至膝閣安得奮飛持
瓣香爲南豐滿蘄與潔

上魏左史了翁啟

陳元普

長安三月懷漫刺以誰從柱史一星燦寒芒之可敬曳裾伊始銜
袖謂何誠念狂瀾旣倒之秋正有小草相依之志心乎考德辭以
見情竊惟人物議論之污隆實繫天下國家之理亂上無禮下無
學識者懼賊民之興大犯義小犯刑終然非有國之福試觀近歲

甚可寒心前輩浸以彫零後生無所則仰善類之勢不合付之乍
佞以乍賢正論之脈僅存聽其自鳴而自息以奔趨爲捷徑以軟
熟爲圓機諂笑呶嘍豈勝夏畦之病醉夢顛倒無復夜氣之存習
成脂韋病入骨髓設有變色動容之警孰爲仗節死誼之人憚林
甫不一鳴何以責其抗祿山之暴見董賢輒下拜終乃折而爲新
室之從長此安窮誰歟特立少壯東方縉紳之氣方賴西州領袖
之儒恭惟國史左史學邃道充氣閑宇足古今貫穿孰量胸中九
雲夢之藏名德穹崇自是魁下三台星之望然且晦才華而不有
遺科級以若無尚友古人潛心大業會同蜀洛上通洙泗之一源
凌厲莊騷下掩淵雲之眾作厥修孔碩所立最高平生榮進之何
心出處從容之以道惟是眾人之皆醉幾於一國之若狂英俊並
遊或由漸而改度名義至重不少貶以求榮抗危言于羣情嬉玩
之時效忠益于萬口唯阿之際雖捧土障江河之決事有至難然
高標凌霜雪之嚴人方共敬能令趙氏九鼎之重端在魏翁一鑑

南宋文獻卷三十一
之明高廟神靈天王明聖是應任天下之重庶幾回世道之趨如
某者洛誦之孫冰氏之子雖他材之苦短徒此念之好修人不堪
其憂何敢改賤貧之素善者疆而附殆不勝飢渴之懷偶緣脫選
調之階乃來作京華之客貴人不喜生語耿懷抱之誰論先生獨
抱古心凜典型之固在輒修向來一瓣香之敬或察下有千歲蒼
之情不介而前唯公斯可每伏高文而晝誦夜夢見之儻令斯道
之朝聞夕死可矣

賀黃制置賜金帶啟

李劉

分閫疇庸賜鞶疏寵三品百鍊焜煌內府之盼萬釘九環表衷中
權之勁不勤使請獨覺道存恭惟某官追琢其相柔惠以直言忠
信行篤敬學素得于書紳極高明道中庸強何虞于衽革上嘉羊
祜輕裘之緩欲厲田單仗錫之橫肆分紫磨之真昭示黃河之信
爲兵餽之何不受從革作辛匪伊垂之則有餘在師中吉向來眾
口之鑠曾不累月而銷賜爾通天略吐胸中之十萬用汝作礪便

看腰下之兩重某聳聽夬揚阻陪旅賀寬營平先零之漕倘免裹
屍賜贊皇于闐之珍尙祈拭目

賀劉察院啟

劉克莊

渙號楓宸升賢柏府昔飢烏久噤虛峩獬豸之冠今鳴鳳一聞盡
革蝸蟻之響福流宗祏喜動縉紳竊以人臣不可受恩于私門君
子必蚤有譽於天下永叔責高司諫猶在館中了翁忤張雷州方
爲博士寧遠作夷陵之役不肯登紹聖之舟故一代擢拜于爭臣
而萬邦仰瞻其名節不圖今日復見若人恭惟某官充直剛大之
浩然兼知仁勇之三者頃陪英俊進列師儒委質爲臣疇昔非冰
山之客拂衣去國始終爲鐵壁之人處之外服而甚安餌以美官
而不顧自執事爲冥鴻之舉而諸賢效仗馬之瘖聖斷赫然既親
攬太阿之柄公言驗矣悔不行曲突之謀遂除紫官俾究前論眾
競遭時而建策獨思拔本以塞源況龍象之共觀何狐狸之足問
去惡如去草勢惟恐其蔓延擒賊先擒王功有如于摧陷翕然伏

第一義之奇偉繼此有數百篇之開陳舊史謂諫如丹青是必本
原于仁義前輩云事皆塵土特留久遠之功名不惟霜簡之凝行
見辰猷之告某羈旅一介閒廢半生方寶紹開奇禍胚胎于詩案
在端嘉際深文倚撫其奏篇及一相之顯朝又五年而在野不圖
衰暮復忝驅馳良由端人得君之初興念寒峻失職之久忝子駿
福星之選愧無補于明時廣徂徠聖德之詩或可陳于薄技

賀傅侍郎挂冠啟

劉克莊

出綽衰賢抗章謝事翛然遠引屢辭加璧之招浩乎莫留竟遂拂
衣之志事光竹帛喜動林泉竊以出處之閒雍容者少永叔避關
弓之害由此乞身沂公懲一網之危退而請老若乃朝廷寶之如
龜玉國人仰之如鳳凰有園林鐘鼓之娛無風波機穽之迫曰貴
曰壽未能或之先何嫌何疑致為臣而去某官古之遺直王之蓋
臣方馬邑之謀始開首云勿擊使延英之諫見聽豈不太平由平
生言論風旨而觀皆當世理亂安危之故白頭一節高臥十年公

雖勇于人山士尙占其出岫今也深維可止之義奏疏益頻苦執
宜休之言詔書莫奪卓哉此舉近者所無使君相重名節之人為
國家倡廉退之俗文階三品奎閣九重於以表而出之異乎求而
得者諸郎鼎貴並行阜蓋之春甲第錦歸重話烏衣之舊品題乎
一草一木徜徉乎某水某邱物外之趣轉深天下之望愈重歸然
下國獨餘一老之存賢哉大夫可繼二臣而去某素懷景行幸覩
遺榮當舉世之橫流聞清風而起立朝無耆舊誰能乞孔戕之留
身是散人或可為老聃之役

謝鄭給事應詔薦賢能才識啟

王邁

鄉校會文不作華途之夢禁林薦士俄飛青剡之章誰為之地以
使然殆若自天而下者感深言淺施重報輕伏念某讀書不多合
世又寡初入綠水芙蓉之幕實在芳洲杜若之鄉每持直道以事
人不敢苟祿而為養豈無膏沐恥為妾婦之容纔奉旨甘遽奪阿
嬖之養殷憂熏灼壯志蕭條居嘗誓墓而出苦辭竟復入京而干

微祿成瓜尚遠食藜良甘乃開門而受徒姑賣文而為活青衫素
髮消磨十載之光陰黃卷短檠感慨千年之治亂世道隘甚人物
眇然父生師教之身為士者鮮知自愛德進言揚之舉在上者多
及其私遂安分以固窮忍徇人而失己敢謂朝廷之法從猶念山
澤之臞儒飾敝帚以千金韻雅鐘于六律謂生涯盃水假之廉介
有守之名而習氣草茅加以直道敢為之譽不特借品題之一字
又將期植立于異時道義合則靡待介紹之求力量大則實異他
人之薦古之所謂知己詎不其然士而苟有烈心皆思自奮茲蓋
伏遇某官學到聖處氣涵天和在韋布之士而有志廟堂為場屋
之文而可刊金石自舉芳于魏第即策足以周行司馬無求功名
迫而後起敏中大耐官職即之若無新天子學而後臣先皇帝留
以遺我談經旃厦陳義格心載筆螭切有文緯國陞華青瑣跬步
黃扉豎起脊梁自任天下之重高著眼力博觀人品之精致使么
麼亦叨收錄某敢不益鞭庸鈍自勵操修若何報塞于私恩惟有

堅持于名節此心歸向湜輩安敢叛于私門不日登庸案公決無
書于政府

通沿江別制帥啟

徐元杰

任隆漢鑰新元帥之碧油禮重燕臺取棘人于素鞞登龍門而雖
早趨燕幙以再春德厚肺腑感深涕泗若時巨鎮繫古秣陵乃江
左之陪京為人材之會府見諸史牒往在晉朝茂弘佐興復之初
則首招顧榮賀循以收南土之望幼度任征討之際亦惟得桓伊
牢之以贊西淝之功故能新亭把酒慷慨以收楚囚之悲別墅賭
碁談笑以致秦軍之卻豈徒天險抑亦眾謀向非得若而人豈不
誤乃公事矧惟今日尤重昔時護數處風之寒僅一帶水之隔投
鞭淮浦馬常欲于飲江荷擔石頭鴻奚安于遵渚雖千里舳艫之
在望而三邊牖戶之寢疏幾于號虞唇齒之可憂或者杞魯瘠肥
之猶忍高談者孰知問東米之價遠慮者未見精北府之兵求文
武材能張吾軍者凡幾論中外事不如人意者尚多公於此時上

以相屬將爲根本之計正在籌畫之間仰稽前修孰稱末議如某者筆花不潤檄草甚蕪一官遡上水之船幾兩費平生之屐鷗心舞而不下莫適天機馬力盡而猶求徒爲人馭棲遲歲月剝落風霜一麾俾試于民庸三釜擬酬于親養雨桑方徹風木不停禮甫畢于松楸分永淪于溝壑詎期陶冶未棄涓塵念其小雅蓼莪之悲起以春秋衰絰之典總卅突弁記童子之從遊敞蓋舊帷歸主人之拂拭遂叨渙渥俾贊壯猶二水三山恍對洲前之白鷺十年一夢驚回枕上之黃梁自頂至踵厥有生成以口語心慚無稱塞恭惟某官國之元氣學者泰山抗高節于忠孝之門折遐衝于詩書之府于蕃南國屢騰申伯之勳分正東郊爰任君陳之託壯虎踞龍盤之王氣清鼉喙鯨擲之驚波營壘之精采頓新已竦聞于威令山河之風景不異方坐應于事機自茲障狂瀾于百川何事閑長城于萬里建大勳業未誇陝右之范韓在小朝廷宜得洛涯之溫石顧居人後亦立客間某敢不收百念于已灰持丹心而如

日後狐邱之一死答鴻造以終身寧飲建鄴水不食武昌魚第懼有疑于避就但入玉門關不望酒泉郡所祈終賜之生全

賀蔣諫議啟

代

方岳

簡自中宸擢居正諫粵躋橫榻得李勉而朝廷始尊陸士大坡用仲淹而士夫相賀蓋以久持天下之正其必能格君心之非永惟治亂之端在小人與君子此其消長之道非宰相則諫官肆吾祖宗立國以來洗盡秦漢諱言之習聽納之盛載籍所無是知累朝熙洽之休正賴諸老箴規之力茲實主上用公之至意豈但先生執政之緊頭恭惟某官質堅百鍊而愈精節貫四時而不改仕者皆嚴憚黯已消落瞻之奸帝曰無以易堯當有沃心之論窺竊聖德時憲天聰雖艱難有甚于絲棼而恭儉本無于袞闕惟是外則桀鰲不臣之虜久已鳴張內則跼蹐不靖之兵敢於狙詐事孰大於此者時其條而上之非仁義不陳于前可使主憂而臣辱有謀猷入告于后所願乾清而坤夷某越在邊城莫瞻朝著稱慶愿者

曰四諫尙能賡徂徠之詩今陽城號爲一賢何待作昌黎之論敢無動色傾聽嘉言

謝江樞密萬里啟

文天祥

領祠官之香火敢望彈冠掌冊苑之丹鉛誤蒙推轂薦非由于識面事真可以語人頂踵銜私額手奏記竊以觀遠臣以所主孟子以言進退之閑遇大賢而相知韓公以爲遭逢之盛蓋受恩非天下之所少而知已得君子之爲難乃若初無左右之先容獨受門牆之隆遇以古道之相與尤人生之至榮伏念某才不逾人學未聞道雖家庭疇昔之教動欲行其本心然山林樸野之資知無補于當世執經而後承恩以來念景行在四海之達尊而科第非終身之能事頗欲自拔于常人之類庶幾無負于上帝之衷頃趨闕下之時適際江干之警主憂臣辱念我生之不時外阻內訌繫禍至之無日因撫躬而思奮遂投匭而獻言當時破腦而劄心何啻焦頭而爛額有倉卒等死之慮無毫髮近名之心六太息之陳豈

曰賈生少年之過三十字之獻幸寬郇模東市之誅逮時事之既平滋人言之無據小體者戚其失措好事者高其得名痛癢無知者以文采爲賢操挾不正者以譁競爲議匪躬之故俱莫諒于初心向口乃窮嘆難行于直道既奉祠而竊祿顯閉門而讀書未可與俗人言姑盡吾分內事不謂見知于長者遂勤延譽于諸公承明之廬著作之庭未嘗夢想寂寞之濱寬閑之野遽沐寵光非華袞有一字之褒何敝帚增千金之重雖深慚于負乘然幸出于鈞陶永堅乃心欲報之德茲蓋伏遇某官清朝碩輔昭代眞儒胷中括石渠東觀之藏海內仰天球河圖之瑞睭惟世道深厲我公整頓乾坤共屹江流之柱獻納日月入旋斗極之樞非徒耀不世之功名將有意太平之禮樂凡今小往大來之會多出前推後挽之功遂使疏庸例叨拔擢某敢不力持素節勉企前修稱彥博于都堂幸借郇公之譽薦仲淹于館職敢忘元獻之知

賀江左相啟

文天祥

大老造朝元台正席歸公有袞繡我來自東用汝作鹽梅王置諸
左三台明概八表清夷洪惟我朝相業之隆莫如元祐家法之懿
路公平章軍國司馬實位昭文正獻議論廟堂微仲嘗升左轄或
以學術真儒而輔君德或以人物直諒而當帝心續遺響于先秦
兩漢之前文章鉅麗挺雄姿于黃河泰山之上器量崇深此自古
之難兼蓋于今而獨見恭惟某官行關百聖名塞兩閒於前輩人
期之以伊尹傳說今從學者尊之如韓愈孟軻尚論公之平生有
報國之大節以君子不用爲我恥以小人未退爲己憂童兒婦女
知其血忱縉紳大夫想其風采自其馳驅外服出入中朝洛中偃
仰之年江上經營之日以至贊先皇之大政參嗣聖之初元賢與
不賢一言定其可否用或弗用四海視以重輕卓然一時人望之
宗展也三代王佐之事屬登庸之伊始問夢卜以孰賢朕安得斯
人哉固無踰老臣者乃申帝指乃穆師言金甌覆崔相之名銀信
趣鄴侯之覲朝士舉笏相賀都民遮道聚觀天子引見以勞歸東

朝出饌以賜宴遂由政路徑秉國鈞先天下而憂斯能後天下而
樂有聖人之任將以行聖人之時莫難得者海內相望之深最罕
遇者君子氣類之合方今師維向父右舉皋陶贊襄於都俞之閒
寅協于和同之際鈞無垠而播物相天地理陰陽鼎有足于承君
安國家定社稷昔講于洙泗者困道路之厄而學于河汾者抱禮
樂之慚道之行歟時則可矣俾我后五三之盛眞吾儒千一之榮
某猥在山栖欣逢府冊親見上下龍雲之會豈徒門闌燕雀之私
陽翟歸耕回首舊時之學士徂徠作頌傾心今日之太平慶忭情
深刊摹語淺

賀趙侍郎啟

文天祥

選表揚綸歸中持橐采石洲之明月光照海山通明殿之紅雲影
搖河漢介圭觀止會弁驩如恭惟某官玉粹金剛冰懸雪跨清廟
生民之作膾炙諸公干將莫邪之鋒指麾餘子自傍天而行斗牛
之渚便拔地而起湖海之樓出入兵閒月柝燈碁之耿耿驅馳江

上參旂井鉞之堂堂儒臣知兵從古所少天子謀帥必在其中方
建纛而前千軍遶帳而不動及還笏而去二童隨馬而有餘悠悠
四顧于山河落落一麾於江海嘯吟水石酌謫仙捉月之魂上下
風檣訪舍人麾軍之迹然有神州陸沈之嘆發而為中流擊楫之
歌屬傳風景于峴山忽駭波濤于天塹長江為備不數處可共險
于萬人朝廷養兵三十年當成功于儒者乃疇庸于東掖仍趣貳
于西曹太乙靈旗出陪豹尾鉤陳玉檻進逼鼇頭青天白日鳳凰
之聲名高山深林龍虎之氣勢前行為兵部小紆帷幄之謀大本
在中書亟正鈞樞之拜某濫巾劇部望履修門班漢從于甘泉宮
喜稱知已勒唐功于浯溪石已戒有司

賀宗臣元正啟

謝枋得

王春尊周人統用夏宗臣垂法一新正月之觀同姓上封獨戴內
陽之泰受天靈貺必世英賢恭惟某官仁意春生道心日麗天才
俊逸合吟紅藥于東風佛性清高獨愛青蓮之明月鳳翩翩而遠

引麟振振而莫知詩禮楚交加意穆生之醴英雄元德留心康成
之言知學問之無窮宜德業之可大想見斯時之草木未忘故國
之山川江曲新蒲動野老行吟之志宮前嫩柳懷上皇攀折之恩
願消西北之嚴凝廣布東南之温厚掃清颺霧見舊日之官儀充
滿乾坤賀今春之喜氣某茅心遊子花淚逋臣嫻嫻秋風思公子
而遙望萋萋春色恨王孫之不歸媿無存趙之忠空有依劉之幸
詩懷雲樹清尊即日而論文夢繞煙花紫禁何時而獻頌後賀禮
簡前期心長

賀步帥除節度使總統軍馬啟

俞德鄰

登壇拜將仗節總戎羽騎旄頭久肅宸居之衛熊旂犀甲式華戎
輅之行雲麗帳轅風清江漢恭惟某官學精八陣勇冠三軍說禮
樂崇詩書自是晉軍之謀帥臨約束援枹鼓豈徒司馬之忘家馳
檄而忠義景從左袒而英雄響應然方略指授已有謝安而性行
淑均孰踰向寵疇咨威望協濟艱難持大將之印而拜軍中統少

軍之節而行闔外彝尊龍勺械斧雕戈愬武古通咸統于弘天地
鬼神亦相此舉人猷前茅之至師張破竹之威祈父子王爪牙豈
轉于恤召武徹我疆土行奏戎公一掃荆楚之氛遂奠邊陲之枕
黃河如帶泰山若礪申固舊盟天閑解駟寶校斥鞍未酬洪伐某
出山計左乘障才疏甚喜中權之有人竊聽下風而增氣雖不能
被堅執銳助成淝水之功尙可刊石磨崖載續浯溪之頌

南宋文範卷三十

